


Akipata Kyo Kifinyu

 Ndaga ugwe, Nkundwe Neville. Ndaga ugwe. Ukwene ko kununu fiyo ukugomokela ku Nyumba ya Ntwa. Une ngwikyela bwila ukugomokela ku kipanga, kali une ngubuku kugu kulikosa. Kilipo ikindukimo ukufwana na kabuyo akanini aka iki une ngulondapo ukugomokela pene. Ikyene kyo itolo, o, une. . . Ikyene kyaali kipanga kyakwanda kangi kyaali kyene iki une njiilemo ntimi. Kangi ukwene kukuboneka itolo kununu ukugomokela kuno kangi. Kangi une ngwitika ukuti ndubunju ulukulumba lula akabalilo kako ilisuba likukana ukumulika kangi indondwa sikusima ulumuli lwabo, une ngwitika ukuti bisakuyapo bamo ukufuma nkipanga iki balipo pala ilisiku lila, aba basukigwe ni Lilopa lya Kang'osi. Une ngugulila akabalilo kala.

² Bo ngwisa ukukinda nkipinda lilino itolo, une nagene na Kalumbu Arganbright kunyuma kula. Kangi umwene ambulaga une ukuti baalipo abandu bamo apa aba baali ku lukomano lwa ku Kingston, aba bayataga akabalilo aka, kangi une. . . i. . . nhobwike fiyo ukuya nabo apa ukuya buketi. Paliposa apa abene bali, linga abene bikubikaga amaboko gabo mmwanya, baali ku lukomano lwa ku Kingston na Jamaica. Itolo, ena, kunyuma kula kunyuma. Syosa silikanunu, ikyo kinunu.

³ Une nguketa ikadi ya ndumi ya Oral. Une ngusakikisya umwe mufumwisye ingomano syake. Une ngaamenye isyene mpaka, amasiku, mpaka mmayolo. Une ngwinogona ulwene lukwanda pa lyabuhano na limo, bule? Lyabuhano-na-limo mpaka pa lyakalongo-na-buhano, Nkundwe Roberts mu Louisville. Lilino, buka kampilike umwene. Nkundwe Roberts yo ee—ee mwinangu gwapandumbula gwa une, kangi umbombi gwabwanaloli gwa Kristi. Kangi une nsisimikisye umwe mukwakwiyela ubulumbili bwake, ubusiku ukufuma busiku. Kangi ee. . . ubwake, akabalilo kako umwene ikwiputula ababine, une ne—une ne nsisimikisye ukuti umwe mukwakuketa Kyala ikwendelela, panongwa yakuti umwene yo kyaloto unkulumba gwa lwitiko, Nkundwe Roberts ali, kangi unnyambala uyu Kyala ikumbombela imbombo namaka. Kangi ubutumigwe bwake bufyukile ukufuma. . .

⁴ Une ngukumbukila akabalilo kako une naalyagene nu Nkundwe Roberts, umwene aali mu kahema akanini akalepukelepuke kula ku St. Louis, Missouri, kangi une naali. . . umma, Kansas City, Missouri. Kangi une naali mu Kansas City, Kansas, nyumba yalukomano. Umwene alitugesye pa kikota kya pankyeni. Ukufuma papo ubulumbilili bumalikege, uswe twabukiile ukusyungutula kunyuma kangi twayobaga. Abene

balinfumwisye une ku mwene. Umwene nninipo kwa une; Oral ali mbwandane bwa malongo mana ga fyinja fyake. Kangi polelo umwene alinkuti, “Ngimba ugwe kwinogona Kyala abagile ukupilika ulwiputo lwangu ku babine?”

Une ndinkuti, “Nkundwe, Umwene isakupilikaga ulwiputo lwa aligwesa uyu ikwiputaga.” Ena, umwene alinkusumuka, kangi umwene alinkuti, “Apa une ngubuka!”

⁵ Kangi umwene yo mundu ugwamahala fiyo, kangi afikile na ku koleji, ifyinja fina ifya kubalaminogono, kangi une nsisimikisye umwene yo—umwene yo nnyambala gwamahala. Kangi umwene afikile pa buyo lilino papo umwene ababombi ba kunfunda ukusyungutila umwene, ni fingi, mpaka, akabalilo kako umwene ikuyoba, umwene—umwene ikwinogona ikylene tasi. Kangi umwe mukwakwikyela umwene, une ngusisimikisya.

⁶ Kangi polelo lilino une ngulonda ukupa indumi inini itolo pa ifi Untwa gwitu abombile mu lukomano ulunini ulwapasi mu Jamaica kangi mu Puerto Rico. Ikyene kyaali kindu kihesya ukuti une naabukile kula, panongwa yakuti ingolelo syo nyingi isi sikwisa. Kangi Leo apa amenye, ukuti isimu...Kangi ukukinda mbwendelo bwa ndungu, gikuyabo amabuyo ba mia aba bikukolela ku ngomano. Loli pope une ngulonda ukwipilika ukulongosigwa kuko une ngubuka, bo lukomano ulu. Linga une ngubuka panongwa yakuti umundu angoliile une ukubuka, kokuti une ngwisa mu ngama ya kipanga pamo ikibugutila kila. Linga une ngubuka panongwa yakuti Nkundwe Neville ayobule ukuti une mbuke, Une ngufimbilisigwaga ukubuka mu ngamu ya Nkundwe Neville. Loli une ngwikyela ukubuka akabalilo kako Yeso ikutuma, polelo ugwe ubagile ukubuka mu Ngamu ya Ntwa Yeso, ukwakwagana na bandu bala.

⁷ Kangi une nalambalele pa kitala, kangi une naali nkatale panandi. Ulukubo ulu, lululu ulu pamo kilabo, une ngwifimbilisya ukusokamo ndukubo ulu, panongwa yakuti ulwene lukuswanyulania ummilo gwangu ku buyo bumo mpaka une ngutoligwa ukwitugasya nu lwene. Une mbagile ukusokapo kangi nukugomokela...Uswe tukwisa ilisiku ilingi, Leo na une, nkati mwa mamailosi malongo mana, ukufuma pakuya kumayibiyibi mu Florida, ummilo gosa gwigwike, kangi ukwingila mu mamailosi malongo mana ga Louisville ugwene gukwigalika kangi. Nkundwe Banks Wood abagile ukuya apa pabuyobumo ulubunju ulu. Kangi ilisiku limo ngwingila ukufuma ku Kingston kangi—kangi Puerto Rico, kuko ummilo gwangu gwaali mpelesye; kangi une nalikile indege, nakaali naali kanunu; kangi bo uswe tukali tukafika ku Jeffersonville, ugwene gulinkwigalika kangi. Muketile, ulwene lo lukubo kuno. Agene go ma bakiteria mu mbepo, pamo lumo ikylene yo Kyala, ikyakwanda, ukugela ukumbela une nsokemo. Polelo, une—une

ndikukipilikisya ikyene. Une niputile kangu ndalusisye utubalilo twingi.

⁸ Loli, palema, une nasumwike ntulo itolo, akene kali kabalilo kakufwana kabutata ndubunjubunju. Kangu unkasi gwangu nu mwanundumiana unini bagonil'utulo. Kangu une nasumwike pa lubafu lwa kitala, kangu une naketile ikilundilo ikinywama kya bandu balyaagene pa buyo ubunywamu, kangu une naayobile kwa Billy Paul, "Ugwe buka mula kangu kabape abandu bala amakadi ga lwiputo."

⁹ Kangu umwene alinkuti, "Ena, tata." Mu nkabalilo kanini itolo umwene alinugomokela, kangu umwene alinkuti, "Ugwe ukabagile ukupa amakadi ga lwiputo ku bandu bala." Umwene alinkuti, "Ugwe uketile unnyambala uyu imile apa?"

Une ndinkuti, "Ena."

¹⁰ Umwene alinkuti, "Umwene ali papapa apa, kangu une ninkuti, 'Aligwesa uyu ikulonda amakadi ga lwiputo, imika ifiboko fyako mmwanya.'" Kangu alinkuti, "Une naabukile ukumpa umwene ikadi lya lwiputo, umwene aabukile kubuyobumo ubungi. Kangu polelo une naabukile ukukilania kula, kangu umwene aakilenie kubuyobumo ubungi. Lilino apa umwene ali kubutali kunyuma ukukilania kula." Alinkuti, "Une ngabagila nukubagila ukupa ni kadi limolyene."

¹¹ Une ndinkuti, "Mulimosa, Billy, ugwe utikufimbilisigwa ukwambilisya amakadi ga lwiputo, panongwa yakuti apa bulipo ubuyo bwingi fiyo apa mpaka aligwesa abagile. . . ." Amakadi ga lwiputo ko kubatamisya ukulwilania. . . umwe muketile, kangu ukubabika abene ndubatiko. Une ndinkuti, "O, une mbagile ukwega aligwesa kula, komma ukukinda aba bali mbuyo bula aba ndinabo, kangu ukubabambika abene kangu ukubiputila abene yumo ukufuma yumo."

¹² Kangu umwene alinkuti, "Umma ndaga." Kangu umwene alinkusanukila ku kililo kangu alinkusokapo pa une. Kangu une ndinkusanukila ukusyungutila injila *iyi* akabalilo kako umwene abukaga injila *yila*, kangu nanketsyaga umwene.

¹³ Kangu une napilike i Lisyu likwisa pasi ukufuma ku Mwanya, kangu lilinkuti, "Loli pa kabalilo aka Une ngwandaga ukukusya ugwe." Kangu une ndinkuketa, kangu une ngaketamo siku uluko lwa kilundilo kya bandu, abene balundikanaga ukufuma kulikosa.

¹⁴ Kangu ingamu ya Nkundwe Roberts yakoleligwe, lilinkuti, "Lilino Nkundwe Oral Roberts ikwisa ukwagana nanugwe."

Kangu une ndinkuyoba, "Une ngumponiaga bulebule u Nkundwe Roberts?"

Alinkuti, "Injila yilayila umwene ikukuponiela ugwe."

¹⁵ Ena, une nalimbwene u Nkundwe Roberts ikwisa afwele isutu indiitu, kangu akatili akanini bo mumo Bing Crosby

ikufwalila, tula utwakukonyolela akene mmwanya kangi kwabila pasi, akatili akatitu akanini. Kangi une naalimile n'dukolumo pamwanya, kangi umwene ikuketa kumwanya nukuti, "Mugonile, Nkundwe Branham."

Kangi une ndinkuti, "Mugonile, Nkundwe Roberts," ukuponia ikiboko kyake.

Alinkuti, "Ugwe uli ni kilundilo ikinunu."

¹⁶ Une ndinkuti, "Ikilundilo naloli, Nkundwe Roberts." Kangi umwene alinkusyumbutuka kangi alinkusookapo injila yiyo Billy abombile, ku kiboko ikililo.

¹⁷ Kangi une ndinkwinogona, "Ngimba une nguyobaga ku bene ukufuma poki?" Kangi une nagelile ukufuma paliposa ukubwaga ubuyo ubwakuyobelapo. Kangi naali mbwitugasye bwa luko lumo, ikindukimo pasi, mpaka une ndinkutoligwa ukuketa papo u—u kuyoba kubene ukufuma poki.

Kangi umunduyumo alinkuti, "Ena, isaga kunokuno kuno."

¹⁸ Une ndinkuti, "Ena, ugwe ukabagiile ukuketa ikinunupo kula." Kangi une ndinkwanda ukukilania ubuyo bula. Kangi une ndinkukumbukila iki palapala, une ndinkuti, "Ikundi ikinywamu fiyo kwa une ko kuumilisa ukuya gwakwilambika mu ndumbula, akabalilo kalikosa, pankyeni pa Kyalala na bana Bake."

¹⁹ Kangi une ndinkusokamo mu mboniboni. Kangi une ndinkwinogona, "Ngimba iki kikusanusya fiki? Lumo ikyene kikusanusya uswe tukuyaga nu luko lumo ulwa... Pamo ko kugu—ko kugu ikyene kikubonekaga?" Umwe muketile, utubalilotumo, mu mboniboni, Umwene atikukubula ugwe katikati itolo ukuti kugu, Umwene—Umwene itolo ikuyoba kangi ugwe itolo... Ikyene kili nkifwanikisyo, mbubonekelo. Kangi umwe mwe mukufunda i Libangeli mukupilikisya ikyo.

²⁰ Kangi polelo une naabukile nkipinda kya kunkyeni nukwitugasya pasi pakabalilo kanandi, kangi iyene yali sala ya butatu-nasinda pamo ya buna ndubunjubunju. Une ndinkuya nu tulo fiyo. Une nagomokile nukwakulambalala, kangi une ndinkugogwa injosi yimo, kangi iyene yaali njosi inhesya ukukinda syosa. Kangi mwe bingi ba umwe mumenye yumo mwa balongosi, Jack Moore. Nkundwe Jack Moore, une mmanyene nagwe ku finyinja. Une ndinkwinogona ukuti une naali pakwangala nu mwanundindwana gwake, undindwana ugwafinyinja ukufwana kalongo na fihano na fibili, kangi nammwegaga umwene pa kiboko, ukundongosya umwene pamwanya pa kyamba kimo, Jackie unnini. Ena, une nummenye umwene ukufuma aali itolo mwana wa kumabele. Kangi une nan'dongosyaga umwene pamwanya pa kakyamba, kangi une naabukile ingindi itatu pamwanya pa kyamba, ukun'dongosya undindwana yu. Kangi uswe twalisile pa kipiki ikinywamu,

kangi umwene alitugesye pasi. Kangi mumo abalindwana abatubwa bingi umwisyugu bikufwala isiketi sila isi, umwe mumenye, muluko lumu sikututubala panja, kangi umwene ali nu luko lwa siketi bo isyo. Kangi umwene aalyegile isiketi innini iyi kangi n'duko lumu abaalwiile panja iyene nukwitugasya. Kangi mumo abakamu bitu abatubwa utubalilo twingi bikuketa yumo ku nnine, umwe aafugatile amaboko gake bo *ulu* kangi alinkwanda ukuketa ukubukila ku mwanya. Ena, Jackie yo ndindwana unnunu fiyo, loli umwene ali na kanwa akanywamu fiyo kangi amaso amakulumba manywamu, kangi uluko lwa nywili sya nsanga, akaya mmogi fiyo umma, loli unkikulu unnini ugwabwanaloli. Kangi une ndinkuketa amaso gake amanywamu akabalilo kako umwene aketege mmwanya, kangi mumo ukundalika kwa mmwanya kwaali mmaso gake.

²¹ Ena, une ndinkubuka amakato mahano ukufuma ku mwene, kangi une nalambalele pasi ndubafu bo *ulu*, kangi naalyegile ifwefwe ya lisu kangi nukuyibika iyene nkanwa mwangu, kangi naalyandile ukutafunya pa fwefwe iyi. Kangi une ndinkwanda ukwinogona, “Ngimba une ngubomba fiki pa mwanya apa? Fiki, une ne mundu unkangale, kangi ndi na aka akalindwana kanini. Fiki,” une ndinkuti, “Une ndimwegi kangi une ndinakyo ikipambo kya bana. Une ngaya nayo imbombo pa mwanya apa nu ndindwana unnini yuu.”

²² Kangi une ndinkwanda ukusumuka. Kangi, akabalilo kako une naasumwike, i Lisyu lilinkwisa ukufuma nkipiki, kangi lyatile, “Iki kyo nongwa ya kimanyilo kangi panongwa ya nongwayimo.”

²³ Kangi une ndinkusumuka, kangi une panini itolo angali ndalatile, i—i njosinyali. Une ndinkwinogona, “O, nguswiga linga iki kikusanusya ukuti une ngugomokelaga nyuma pamo ikindukimo kikubonekaga kwa une?” Ena, une ndinkwinogona, “Linga une ngubuka ukugela ukubombela imbombo aminogono ga nimwene, polelo une ngufuluganisigwaga mosa, polelo une ngugulilaga itolo pa Kyala.” Kangi une ndinkwanda ukwiputa. Une ndinkuti, “Ntwa, ngimba injosi yila yifwene ni mboniboni yila itolo nkiyabo ikyandane ikya kilo, pamo ikyene kikusanusya fiki?”

²⁴ Ukufuma pa kugulila akabalilo kamo, lumo isala yimo (Unkasi gwangu asumwike kangi umwene aatendekisye ifindu fyandubunju.), polelo i Lisyu lilinkugomokela kangi, kangi lilinkuyoba, “Buka ku Kingston, kangi ukwene kukubuligwaga kwa ugwe kulakula iki ukabombe.”

²⁵ Polelo, nakalingalinga itolo une ndinkubuka ku Kingston. Kangi abene—abene baamenye i Kina pamusi ukuti une nguyaga kula pa Kihano. Uko ko kufumusya kwene uko uswe twalinako. Une ngaya mmanyi fiyo mma pakutendeka...?... pamo ukusakikisya ifilundilo, panongwa yakuti une utubalilo

twingi ngongelelapo pa mbalilo. Loli ubusiku bwakwanda, une mbagile ukuyoba uswe twaali nabandu ukufwana kalongo na babili, o, ukufwana abandu elifu yumo na bamia babili, panja, panongwa yakuti ulwene manyikigwe ilisiku limolyene itolo. Kangi ilisiku lya kilabo abene balikwanda infumusyo ukwenda amamailosi mana, pamwanya pakupiilana, ukufyuka mfyamba. Ugwakubopa yumoywene endaga ku sala sina, kangi polelo ukundekela umbopi uyungi ukubuka pamwanya pa kyamba. Kangi ubusiku bwakibili balipo ukufwana ba elifu bahano. Kangi ubusiku bwakitatu ukwene kwasakikisigwaga ukufwana abandu ma elifu kalongo na bahano, lumo malongo mabili. Kangi baalipo maelifu ukolosania na maelifu aba balisile kwa Ntwa.

²⁶ Kangi imboniboni yaali, ikipanga ikinini, undindwana ali mfunde, u mwanike itolo, kangi ikyo kvasanusyaga ubufunde bwa kipanga. Kangi ingindi sya nkaya sitatu ukufyukila pa kyamba, syali masiku matatu aga une nabagiile ukubombela imbombo. Kangi ukwega ikipanga ikifunde ikinini pa butumigwe bwangu, ukufuma papo umwene aali, ukufyuka mu findu fya Kyala, mpaka ikyene kyaaseniyendile isungo yosa.

²⁷ Kangi, o, abalundumbilili, nabandu ukusyungutula, ukulila nukusuma nukupepeka, “Itolo ubusiku bumo pamo bubili ukongelela,” abakulumba ba kaya.

²⁸ Uswe twabukile ukufuma apo ukuya ku Puerto Rico. Kula uswe twaalyagene ni fikulumba, ukuponjola kukulumba, kangi maelifu na maelifu paafinyilisenie ndubingilo, mpaka ukwene kwasakikisigwe imyoyo impala ukufwana maelifu malongo mana gyalisile kwa Ntwa Yeso. Kangi bo tukubuka, une ngusubila une...une mbagile ukuyoba iki ku kipanga kya kyanimwene, loli ndinkutoligwa ukubomba ikyene panja kubandu, ukusyungutula kuko abandu bakukaya bakayako, panongwa yakuti ikyene kibagile ukuketigwa ukuya kisobi. Loli une ndinayo ingamu ya n’dongi apa pa kakalatasi kanini, uyu ayobaga ubuyobi akabalilo kako uswe tulagege, palapala pala, umwene na babombi bake.

²⁹ Kangi une...Umwene—umwene aatile, “Uswe tupegigwe uluyindiko mu lusungo ukuya nabalumbilili bakindanekindane.” Umwene alinkuti, “Akabalilo kako Tat. Billy Graham aasokilepo itolo pa lusungo ulu amasiku aga gakindilepo,” kangi alinkuti, “uswe twali nu—nu lukomato lwalwimiko,” umwene alinkuti, “loli Billy Graham atatwalile uswe Inongwainunu yilayila iyi uswe twaapilike bwila.” Umwene alinkuti, “Polelo uswe twayindikigwe ukuya na Tat. Roberts pa lusungo ulu,” umwene alinkuti, “kangi Tat. Roberts aatupele uswe ulukomano ulukulumba ulwa masiku-matatu. Loli,” alinkuti, “ifyakuula fyali fyantengo fiyo mu nyumba syakugonamo,” alinkuti, “kwasyele amadola maelifu malongo

matatu na mahano, ukuya fyakuula mu nyumba syakugonamo.” Umwene alinkuti, “Polelo Tat. Osborn aali kuno, uyu yo aali ntumigwa gwa Kristi unkulumba. Loli,” alinkuti, “akabalilo kako Tat. Osborn atulekege, kwalipo ukusulumania,” alinkuti, “ukwene kwabonekaga ukuya kilikyosa kyabukile.”

³⁰ “Loli,” alinkuti, “uswe tukuketesya ndukomano ulu ukuti pakalipo naloliloli aligwesa fiyofiyo pa kigemo ukuti Nkundwe Branham abiputile. Loli,” alinkuti, “ukufuma papo ubulumbibili bumaliike, uswe tulinkusala ukwisula ama lole ifya fikota ifyaiyolo kangu ingili syababine na filifyosa, mula nkilundilo.” Umwene alinkuti, “Umwene akaali munda akabalilo aka, Kyala aalisile kwa uswe,” umwene alinkuyoba.

³¹ Une ndinkuti, “Komma ukugulila inyiputo syangu; loli inyiputo syinu panja pala, bika amaboko ginu pa yumo pa naine.” Kangu abene batwalaga lumu kalongo na babili pamo malongo na mana pa kigemo, kangu, akabalilo kako ukumanyandumbula kukwisa pasi pala, abandu bakuutaga itolo. Uswe twitugasyaga mu nyumba yakugonelamo iya kiyabo kya buna, kangu twabikaga ihela pafyosa ifi tuulaga twibene ni njila syitu, twibene.

³² Umwe mugelile ukubomba ikyo, mwibene, ni fyakalongo fyinu ifi mukutuma kwa une. Ikyo kyo iki ikyene kibobile. Kangu une ngulonda umwe mumanye ukuti, ukufuma pa fyosa fila, umwe muli nikiyabo pa ikyene. Kangu mu lisiku ilikulumba ilyalwimiko ili likwisa, Kyala isa kupaga umwe ikyabupi ikyo. Muketile, umwe mukaafimbilisigwaga . . .

³³ Linga umundu mwene ikubuka kangu ikubomba ikindukimo, polelo, umwe muketile, akabalilo kako umundu yula ikusokapo, abene bikwinogona, “Ubusulumanie ubunywamu, Kyala atulekile uswe.” Kyala atikubaleka umwe. Umwene ali na umwe akabalilo kosa. Muketile, ikyene yo umwe itolo muyege nkati mwa kyene bo gwesa, bo aligwesa. Kyala abagile ukubombela imbombo umundu yumo pa butumigwe bumo, loli ikyo kitikusanusya ukuti umundu yula ali nukusala kumo pa Kyala. Ulwene lo lwitiko lwako gwimwene mwa Kyala.

³⁴ Kangu abene basookaga panja pala mu tugileta twa magudumu utukulu, utu abene begaga bo ga magudumu ga mbugonela-mwana, kangu—kangu ukutendeka ikitala, nukulambala pa kyene kangu nukubatwalilamo pa magudumu abene. Kangu ukufuma pa lukomano ukuti lumalike, mosa mu stedyamu bapyagila ngamo, abene babukaga itolo mulamula na malole nukukwabilamo utugileta ni fikota fyabalemale ifyaiyolo, kangu ingili kangu utugonela babine ni fitala, kangu itolo kuko abene basookangapo itolo nukufileka ifyene, panongwa yakuti Ukuyapo kwa Ntwa kwaali pala. Ikyo kyo iki uswe tukulonda ukuketa. Umundu ikusookapo pa kibonekigwe kokuti, Kyala yo ikwendendeka.

³⁵ Ukugomokela, ukutula itolo lilino ulubunju ulu, une nguyapakuyobaga mu maminiti manandi. Kangi une mbalalusisye abalumiana ukuti bangafumusyaga itepi iyi. Amasiku matatu une ngelile fiyo ukwinogona, “Ngimba une kiliku iki une nguyobaga ngapo?” Kangi ulubunju ulu, bo ngali ngasookapo, une nipilikaga ukusoka kwabwanaloli ukusisya mu ndumbula yangu ku kipanga. Kangi une mbabulile abene, “Ega i tepi, loli komma ukufumunya iyene kukulisya.”

³⁶ Loli bo tukali tukabomba iki, une ngulonda mbapepo umwe ubuketi bunini, ukuti ubwene bubagile ukubabombela umwe ubununu. Ubwene bwaalimbobile une ubununu. Uswe twaabukile pa bwendo bwa kuloba iswi ku masiku-matatu, Leo na Gene na nine, kangi umwanangu Billy Paul nu nkasi, kula ku mwinangu uyu ikwisa kuno ku kipanga, ukufumila kula ku Georgia. Kangi abene batweegile uswe ukugomokela ku mayibiyibi gamo, une ngakumanya ukuti ko kugu itolo lilino, kifuki ku Okeechobee pamo ikindukimo bo ikyo, une ngamanya ingamu iyi bala aba Hindi ba Seminole bakupele ukwene. Loli, palema, uswe twaali ma mailosi mingi fiyo kunyuma kula.

³⁷ Kangi uyu Nkundwe Evans, unnuguna ntulwanongwa. Kangi umwene yo ndoba'nswi nkulumba, kangi umwene aabukile ukugomokela ku mayibiyibi amasiku manini aga gakindilepo. Kangi abene balinayo injoka iyi bikuyikolela “ngwaya yapasi.” Kangi i ngwaya yapasi yalin'dumile umwene, kangi umwene pasyele panini ukufwa. Ikiboko kyake kyaliswile, kangi abene balimmwegile umwene ku n'ganga kangi abene balimpele umwene isindano. Ifindu fila finyali naloli. Kangi abene balinagyo masapakanwa mingi fiyo kunyuma kula bope, masapakanwa, mokasini, ingwina ubutali mpaka amakato malongo-mabile.

³⁸ Kangi akabalilo kako uswe twalobaga kunyuma kula, une nakolile imbasa ingulumba inywamu. O, ilyene lyaali lisiku lwabwanaloli i-i ilyakutusya. Kangi umwene aali nnywamu fiyo une ndinkutoligwa ukunsosyamo umwene ukufuma mmisi, kangi umwene alinkubuyondola itolo imbeja nukubopa, pamo ukwikwaba mwene kubwabuke. Kangi uswe twakabile imbasa nyingi fiyo, ukufwana ubusito amapaundi abamia babili na malongo mahano aga mbasa. Kangi abene, simo mwa syene nsito amapaundi mingipo, kangi ukufuma mapaundi mana ukubuka mahano na mabili, mahano na matatu. Kangi une naakolile unnywamu uyu, kangi umwe abopile nukwiyabula.

³⁹ Kangi ndinkusopa kangi, kangi une—une naakolile uyungi, ukufwana mapaundi mahano na limo, mahano na mabili. Kangi une naali ni ngili indali iyi ugwe gwafimbilisigwaga ukukolelela mmwanya pamwanya pa mani ga miyibiyibi. Kangi Nkundwe Evans aali...Uswe twesa twaali batime panongwa ya kogela mmisi, panongwa yakuti ukwene ko

mayibiyibi matupu. Kangi umwene aafulile ifilato fyake kangi apetekile amalundi ga sulubali yake, kangi alitugesye pa kabuyo kanini akumu, n'duko lumo ulwakumika imyenda gyake. Kangi umwene ayibwene iswi inywamu iyi yikwelela ndisu, kangi une nogelaga ukubuka ku mwene. Umwene alinkuti, "Gulila panandi, Nkundwe Branham, une ngunkolaga umwene kuli ugwe." Kangi umwene alinkubopela kula. Kangi une natalile ukuyikwaba iyene mmwanya, ngusakikisya inswi yali kifuki mfwe, yilambalele mmami. Kangi umwene alinkubopa ukwakumpimba umwene. Kangi, akabalilo kako umwene abombege, umwene alinkukuuta, kangi umwene alinkwisa apa ukugomokela. Ingwaya yalin'dumile umwene.

⁴⁰ Kangi uswe twaketesise ikyene, kangi ago gali mina ga mino nkilundi kyake mumo ingwaya iyi yalintikile umwene, kangi ikyene kyambabaga umwene fiyo mpaka amasosi gaali mmaso gake. Alinkuti, ipilikaga ukuya bo ififupa fyake fyalilikaga itolo. Kangi uswe twaali pala, amamailosi mingi kunyuma kwa mayibiyibi. Umwene yo nnyambala unywamu ukuti tumpimbe. Kangi akabalilo kako injoka yikulumile ugwe, ugwe kuya mbine fiyo mmamini manandi itolo mpaka ugwe itolo kuya kifuki mfwe. Kangi Leo aalipo alimile. Kangi ikindikimo kyalisile mminogono gangu, "Ugwe ukaali yugwe Kyala!" Kangi akabalilo kako umwene akolaga ikilundi kyake nukukikamata ikyene, kangi na mina ga mino mabili mula mumo ingwanya yila yaalinkamete umwene, une nabikile amaboko gangu pa buyo bula kangi ndinkuti, "Ntwa, ukwene kusimbigwe N'disyu Lyako, 'Abene bisakukanyaga pa mitu gya miyoka ni fipilili, kangi nafimo munjila yiliyosa fisakubafulasyaga abene.'" Kangi akabalilo kalakala, ububabe bulibosa bulinkusokamo nkilundi kyake. Alinkufwala ifilato fyake kangi nukuloba iswi ilisiku lyosa.

⁴¹ Alinkwingila mula ikilo kila nukubabula abene isya ikyene, abene balinkuti, "Ugwe kinunupo ubuke ku n'ganga."

⁴² Umwene alinkuti, "Linga Kyala ambakikisye mpaka na lino ulu, Umwene isakumbakikisya une injila yosa iyi yisyele." Uswe twalobile amasiko matatu, nakimo ikibibi posa.

⁴³ Kyala akaali yo Kyala. Umwene ikwima nu lufingo lulilosa. Kangi pa butumigwe bwangu bosa, ako ko kabalilo ka kwanda une ngetilemo Kyala isile ku bulume bwa njoka, panongwa yakuti akene kaali kakwanda une nalimo siku nulusako ukwiputula yumo alumigwe ni njoka. Kikukwitikisya ugwe itolo ukumanya ukuti Umwene ikwima ni fingo Syake syosa, kangi Amasyu Gake manunu kangi gabwanalilo. Amenii.

⁴⁴ Kumbukilaga ingomano ikilo iki kangi Ikitatu iki kikwisa. Kangi iputilaga umunduyumo lilino uyu naloliloli ikulondigwa ukwiputiligwa, uyo yo une. Kangi, kumbukilaga, bukaga ku

lukomano lwa Nkundwe Roberts akabalilo kako ulwene lukwisa nkaya, kangi mumponie umwene ukufuma kukipanga iki.

⁴⁵ Bo uswe tukali tukabala a Masimbo, une—une ngulonda uswe twime ku miniti limolyene. Kangi, kisita fyakwimbila, unko twimbe itolo ulukobelo pamo sibili ulwa lwimbo ulwimikigwe ulwa kipanga, *Ulwitiko Lwangu Lukuketa Kwa Ugwe*. Umma ndaga, aligwesa ingililege mumo na nine lilino, kangi unko twimbe ulwene. Kangi komma ukwinogona mumo ugwe kwimbila mma, imba itolo ulwene ku lwimiko lwa Kyala. Ngimba ubagile ukutupa ubulongosi pa lwene, Nkundwe Neville?

Ulwitiko lwangu lukuketa kwa Ugwe,
Ugwe Kang'osi gwa Kalivari,
Mpoki Gwakyala;
Lilino mbilika une bo ngwiputa,
Sosyamo ubwitopbesye bwangu bosa,
O nyitikisya une ukufuma ilisiku ili
Njege gwesa Gwako!

Bo ngwenda munguto inditu iya bumi,
Kangi ubusulumanie ukusyungitila une
bukusata,
Yaga Ugwe Ndongosi gwangu;
Kagaga ingisi yiyege pamusi,
Fyula ubusulumanie, uboga nukutaaga,
Pamo ukundeka une nsobege
Ukufuma kwa Ugwe ndubafu.

⁴⁶ Ni mitu gyitu ginamisigwe, une ngulonda ukubala ukufuma mbusimbe bwa Libangeli, Mwikem. Matai, untu gwa 7, amanandi ga 13 kangi ga 14. Kangi Untwa aliongelelaga isayo Syake ingabi akabalilo kako uswe tukubala Ilyene.

*Ingilaga ugwe mu kipata ikifinye: kabuno ikipata kyo
kipapate, kangi injila yo nywamu, iyi yikulongosya
ku bonangiko, kangi bingi kula baliko aba bikubuka
ukwingila kulakula:*

*Panongwa yakuti ikipata kyo kifinye, kangi injila yo
nsekele, iyi yikulongolela ku bumi, kangi banandi balipo
pala aba bikuyaga iyene.*

⁴⁷ Unko twipute. O Kyala, Gwe utwele kangi Ntwa Yeso ukufuma ku bufwe kangi ku lipumba, kangi untwele Umwene kwa uswe ulubunju ulu ukuya Kyakwiyipa kyabumi, uswe nukwilambika tukubika ubumi bwitu kwa Ugwe mbupya, pa minogono aga Ugwe ubagile ukuya gwakwitetemela fiyo kwa uswe. Bo uswe twakaali batulanongwa, tufwile mbonangi na mbukilanio, Ugwe gwatumile u Mwanundumiana Gwako mwene untiga, apeligwe n'duko lwa mbili untulwanongwa, ukuya kyakupyanikisyapo pa mbibi syitu, ukuti Unsitabonangi,

ikukubilwa panongwa ya batobesigwe, abagile ukusayanisania uswe palikimo kangi mbwinake na Ugwe.

⁴⁸ Kangi, O Kyala, linga bulipo ubutulwanongwa nkati mmyitu ulubunju ulu, ikindukimo iki kibagile ukupinga u Mbepo Mwikemo ukutwala kuli uswe Indumi ya Kyala ku ndumbula yiliyosa, uswe tukusuma ukuti, nukwilambika, Ntwa, Ugwe tuswaga uswe panongwa ya ngilanio syitu. Tusukege uswe ni Lilopa Iya Ntwa Yeso. Uyu... Uswe tumenye, nkati mmyitu, uswe tuli nakimo, kangi uswe tukwilata ukuti uswe tuli nakimo. Loli Ugwe uli mwelu, Ugwe uli gwabwanaloli, Ugwe uli mwikemo, Ugwe gwe Nyibuko yiyo iya kisa. Kangi uswe nubwilambiko tukwafula kula umwisyugu, ukuya bo myoyo igyakulamba. Mumo ubuketi bubukile panja, ukufuma ku Jamaica kangi ukufuma ku Puerto Rico, kangi kuko Ugwe ubombil'imbombo ingulumba isya luko lula, O Kyala, ikyene kyo kimanyilo ikye kwisa kwa Ungolofu Yula.

⁴⁹ Mumo Ugwe umpokile Nkundwe Evans ukufuma ku mino aga matamakali aga liyoka, panongwa yakuti umwene ali mwitiki, kangi Amasyu Gako go gabwanaloli akabalilo kosa. Lilino, Ntwa, tupokaga uswe ukufuma ku mino ga bufwe ulubunju ulu, kuko undugu atulumile nukupa amatamakali uswe. Itikisya amafuta Gako agakubumbulusya, ulubunju ulu, Ntwa, gisusyeye imbepo syitu kangi nukutusuka uswe ukufuma mbusitabwikemo mosa. Bumbulusyaga ababine mu mibili imipalamasigwe igi giswanyuligwe na maka ga n'dugu. Bosa aba bali mu Kuyaba Kwakyaala, bali bumbulusigwaga abene.

⁵⁰ Yobaga kwa uswe ukwisila mu Lisyu Lyako ilisimbigwe, Ntwa. Kisita kumanya ifyakuyoba, loli Ugwe kutupaga ikyene. Kangi Ugwe tusokaga uswe, Ntwa, kangi tupelaga uswe ukwitendekesya ku Kwisa Kwako. Kabuno uswe tukusuma iki mu Ngamu ya Yeso kangi panongwa Yake. Ameni.

⁵¹ Une akabalilo kosa ngukaabila, panongwa yakuti une nguliile lilino. Kangi isukulu ya Ndungu, une ngusakikisya, yisokiile. Loli kilipo ikindukimo ukufwana na ikyene, akabalilo kako une ngwisa kukaya une ngwipilika itolo ukuuti une ndinako akabalilo kingi. Umwe mumenye, uswe tukuya mukubopelebopela fiyo, munjila yiliyosa. Polelo, uswe itolo tukwitikaga Kyala.

⁵² Untwa gwitu aabikaga ukusoka ukukali uku ku bandu ba ngulilo Yake, abandu aba baali biputiputi fiyo. Kangi Umwene alinkuti, "Ikipata kyo kifinye, kangi injila yo nsekele, iyi yikulongolela ku Bumi, kangi banandi bikuyangapo aba bisakuyagaga Iyene." Lilino, ikyene kikaali nongwa yakuti abene bakaali biputiputi. Abene baali biputiputi fiyo. Kangi panongwa abene basubilaga mu kipanga kangi mu fimanyisyo fimo kangi mu fipaguko, kangi balitike (ku bupimo bumo) mwa Kyala, abene binogonaga ukuti filifiyosa fyali kanunu itolo.

Loli Umwene ababulaga abene ukuti bikuyangapo banandi aba babagile ukwingila mula.

⁵³ Kangi une nguswiga ulubunju ulu linga une ngabagila ukufwanikisya ungulilo yila ku ngulilo iyi. Muketile, ukwene kwali kubwigalilo bwa kabalilo ka Kiyuda, kangi Umwene asosolaga kunyuma ku bakindane bala kangi ubwigale ubukindane ubwa tubalilo utukindane, kangi ababulaga abene ukuti ikindu kilakila kikyoy iki kyabombigwe ntubalilo utwaiyolo kyabombigwaga pankyeni pa bene. Kangi abene balinkutoligwa ikukyagania ikyene. Kangi unko uswe tukete fimo mwa findu ifi Umwene ayobaga.

⁵⁴ Abene, tufwanikisyege, balinkutoligwa ukwitika ukuti Kyala aali mu Nnyambala yula. Ikyo kyo kyaali kipingo ikinywamu ukukinda fyosa iki abene baafumbilisigwaga ukukilania, kyaali bulebule Umwene ukuya Mundu loli ipelaga Mwene ukuya Kyala. Abene balinkutoligwa ukuketa mumo Kyala abagiile ukwitugasya mu mbili gwa bandu. Kangi mu ngulilo syosa, ntubalilo tulitosa, Kyala akabalilo kalikosa ikwitugasya mu mundu. Umundu yo ntuli gwa Kyala. Mu ngulilo yiliyosa, Kyala ikuyoba kubandu Bake ukwisila mmilomo gya mundu. Umwene bwila ikusala umunduyumo pamo ikindukimo iki Umwene abagiile ukubombel'imbombo.

⁵⁵ Kangi Umwene alinkubakumbusya abene, ukuya bo batabisanie fiyo, ukufwana ni sya Abraham. Umwene alinkuti, alinkubabula abene, "Linga umwe mukwikolela mwibene ukuya 'bana ba Abraham,' Abraham u 'gwiseme,' umwene aaketile ilisiku Lyangu kangi asangalwike ukuliketa iliyene. Abraham, unsololi." Kangi kisita kwilamwa ukuti Yeso alinkubakumbusya abene ukuti Umwene aasisimikisye ku bene ukuti Umwene aali yo Mesiya, panongwa yakuti ikimanyilo kya Mesiya kyankongaga Umwene. Kangi ukwene kwaali mu njila yilayila ukukinda mu ngulilo yiliyosa, ukuti, ikimanyilo kya Mesiya. Loli palema nalinga Umwene ikwipela Mwene ukuya Mesiya, ikyo kyabatabaniaga abene. Abene balinkutoligwa ukupilikisya ikyene.

⁵⁶ Lilino, akabalilo kako Abraham (uyu abene bankolelaga gwisabo) aalyagene na Kyala, Umwene aali mu mbili yope, panongwa yakuti Umwene alyaga inyama ya ngwata, alinkulya unkatu gwa filombe (kangi nukunwa ulupyu) ni kyambiko, pankyeni pa Abraham, kangi palema akabalilo kosa Umwene aali Kyala. Abraham alinkummwagania Umwene, Kyala, kangi alinkukolela Umwene "Elohim," iki kokuti Yehova Gwamakagosa. U Nnyambala afwele imyenda, nulufumbi pa Mbili Gwake, kangi itugesye pasi pakipiki, ukuya kipepo, nukulya inyama nukunwa ulupyu. Polelo aba Yuda abatalale, abagasi-ndumbula, abigana-bene, abikemo bala balinkutoligwa ukwitika Umwene ukuya Mwanundumiana gwa Kyala, loli

nukunkolela Abraham tata gwabo. Kangi Umwene alondaga abene ukuti bamanye ukuti Umwene abombaga ifindu filafila, mu mbili Gwake, ifi Kyala aabombile mu mbili ugungi akabalilo kako Umwene aaganege na tata gwabo, Abraham. Kangi Abraham aalitiike ikyene. Kangi abene balinkutoligwa ukwitika ikyene.

⁵⁷ Umwe muketile, akabalilo kako Abraham itugasyege pasi pa kihema kyake panongwa yakuti umwene aasalile ulusalo lwake, kangi ulusalo lula lukutwaligwa pankyeni pa mundu aligwesa yu ikupapigwa nkisu. Ikipiki kya bununu nu bubibi kibikigwe pankyeni pa mundu aligwesa. Kangi akabalilo kako Loti, umwipwa gwake, nabatimi babo bandege ukumana panongwa yo migunda; Abraham, ukuya nnyambala ngolofu, alinkuyoba ku bene, “Pangaya ngapo itolo ukumana pakati pitu. Umwe itolo salaga injila yiyo umwe mukubukaga.” Ubuyu bula bukwise mu bumi bwa mwitiki aligwesa. Kangi ubwene bwisile pankyeni pa ugwe ulubunju ulu, kangi ubwene buli pankyeni pa une.

⁵⁸ Loti akaalinogwine ukuti umwene ikugomokelaga nyuma, loli umwene alinkubuka kukuketesya ukwingilila ku Sodomu kuko ifindu fyaali fipepe. Kangi tulipo utubalilo twingi utu uswe tukulondesya injila imbepe. “Une ngwingilaga ikipanga ikyakuti-kyakuti iki, ugwe uketile, nayuma ikuyoba kamo akakulwana na ikyo, panongwa yakuti ikyene kyo kipanga kinywamu ukukinda fyosa nkaya.” Injila imbepe yila! Utubalilo twingi uswe tukubomba ikyo, akabalilo kako, uswe tusobile!

⁵⁹ Kumbukilaga, linga kukonga Kristi, ugwe kubengigwaga na bandu, kabuno bosa aba bikwitugasya ubunyakyala mwa Kristi Yeso bisakukubilwaga ubufwimigwe. Kangi linga ugwe kwisa kwa Kristi, ugwe utikwisila nkipanga kimo, pamo ikipaguko kimo, pamo ikimanyisyo kimo. Ugwe kwisilaga mwi Lopa, iyo yo yene njila yakwingilila. Kangi ugwe ukabagila ukubikisigwa na yumo umma, ugwe kwisaga gwimwene kangi kwimaga pa bwilate bwa gwimwene nu lwitiko lwako gwimwene. Ugwe utikwitogaga pa lwitiko lwa ntimi, pamo pa mama gwako. Ugwe kwisaga ukuya bo gwimwene akabalilo kako ugwe kwisa kwa Kyala! Kangi utubalilo twingi uswe tukusala isalo isyabutoyofu isyo.

⁶⁰ Bule linga Loti, akabalilo kako umwene aaketile fyosa fipepe...? Umwene aaketile kuko kwaali'hela nyingi kangi ubufumuke bwingi, panongwa yakuti umwene aali nhesya, kangi mundu nkomu, ummanyili, ukubalaminogono kwingi, kangi umwene abagisenie ukubomba ifindu fimo palema nalinga uumilisya ubwiputiputi bwake. Umwene inogonaga, “Une ndi nu lwitiko mwa Kyala, polelo une ngubukaga itolo mu Sodomu kangi une—une ngukabaga utuhela utwakongelelapo, kangi une nguyaga mundu unkulumba, lumo undumbilili ugwapamwanya.” Muketile, ugwe uli nu lusalo ukutendendeka.

61 Kangi ikilundilo kili nu lusalo ukutendeka. “Une ngubukaga kula ku kipanga kimo iki pala. O, aligwesa nkaya ikwinogona iki kyo kikindafyosa! Fiki, unkulumba gwa kaya ingiile ikipanga iki.” Lilino, umwene abagiile ukwingila ku kipanga iki kyaali kinunu fiyo, loli ugwe kufimbilisigwa ukukilonga ikipanga kila na bandu bake ukwisila m’Masimbo. Utubalilo tumo abene bikubuka panongwa yakuti iyene njila ya bandubingi, a—a bandu bikufwala kanunupo aba bikubuka ntubuyo tumo. Kangi apo po apa uswe tukusoba ubusobi bwa a—a kufwanabo. Lilino ketesya iki.

62 Kangi Abrahamu, ikindu kyene iki umwene abagiile ukubomba ku kwegwa ulusalo lwakibili. Kangi utubalilotumo ulusalo lwakibili lununupo ukukinda ulwakwanda, linga icyene kikuboneka bo icyo. Ketesya, pakaakindile akabalilo katali’mma, akabalilo kako Loti aketege akaya akanywamu, umwene akaaketile unkasi gwake ikusanuka ukuya mbanda ya munyu, palema, umwene akaaketile umoto gukokya akaya kala. Loli Abraham alinkwega injila na bafuyuligwe banini ba Ntwa. Umwene alinkusyala ndulanga.

63 Kangi, palema, bule linga Sarah abagiile ukuyoba . . . Lilino kumbukilaga, Sarah aali nkikulu ummogi ukukindabosa nkisu kyosa. Akalipo unkikulu unnunu ukufwana na Sarah. Aligwesa, ambwene umwene, alinkugwa ndugano nu mwene. Lilino, kyaali kipepe bulebule icyene kyabagiile ukuya kwa Sarah ukwega uluko ulwa lusalo. Loli umwene asalile ukusyala na Abrahamu.

64 O, bakikulu, komma ukumwitikisya u setano agoge amaso umwe, ukuya mfumuke nu kwingila *iki* pamo *ikyo*. Ugwe syalaga na Kristi! Kabuno, isala yili kifuki, ukubongotola ukukulumba kukwisa, ukubibipo ukukinda Sodomu na Gomora, ukwa kisu iki. Sodomu na Gomora isakuyaga mfunjo kwa icyene.

65 Lilino, akabalilo kako Abrahamu aalyegile injila yila yaapeligwe ku mwene nu Kyala, kangi aali nu bufinyu bwa kisu, umwene akaali nkabi nakamo. Loli akabalilo kosa iki umwene akimenye ikindu kimokyene, umwene ambombelaga Kyala kangi umwene itikaga Kyala.

66 Polelo ilisiku limo balisilepo abanyambala batatu, kangi abene bali nulufumbi kangi bakatele, kangi Abraham alinkubapelel’ikisa abene, umwene alinkuti, “Isaga apa kangi itugasya pasi pa nsyunguti pa kabalilo kanini.” Kangi akabalilo kako umwene imege pala ikuyoba kubene, umwene alinkusyagania ukuti abene bakaali itolo banyambala baitolo mma, m’buyobelo bwabo. Abene bali bakindane. Kangi Abraham alinkubuka nukugoga akangwata nukutuma ukuti akene katendekesigwe, kangi nukuti Sarah atendeke unkati nukwitendekesya ukubalyesya abene.

67 Lilino kumbukilaga, babili ba abene bali Bandumi, Bandumi mu mbili gwa bundu, kangi yumo mwa bene aali Kyala Mwene. Kangi Umwene uyu aali Kyala asanwisye inyuma Yake ku kihema.

68 Kangi Sarah alitugesye mu kihema. Une nkiganile ukuketa unkikulu ikwima pa buyo bwake bo ulo, komma ukubuka panja nukumbula undume isyakubomba, kangi akabalilo kosa aka umunduyumo ikwisa. Loli umwene aalitugesye mu kihema. Kisita kwilamwa, lumo ikusuka isahani pamo ukubomba ikindukimo.

69 Kangi Yumo uyu Uyu aali Kyala, Umwene alinkumilisya ukuketa ku Sodomu, kangi Umwene alinkubabula abene iki Umwene ayaga pakubomba. Kangi a Bandumi babili balinkubuka mula ukulumbilila Inongwainunu. Loli Uyu alinkusyala kunyuma, uyu yo Yumo uyu aali Kyala, kangi Umwene alinkuti, “Une ndisakufisaga ukufuma kwa Abraham isyakusofu isi Une nsimenye, panongwa yakuti umwene ikuyaga gwa kilingo gwa kisu kyapasi.”

70 O, uswe tuli nabo ubwabuke ulubunju ulu, kipanga, ukumanya isyakusofu isya Kwisa kwa Ntwa. Kabuno, “Basayigwa abapela lutengano, bisakukoleligwaga bana ba Kyala. Basayigwa bo bene aba bikuya ni njala ni kyumilwa, abene bisakwikutisigwaga. Basayigwa bo bikemo mu ndumbula, kabuno abene bisakumbona Kyala. Basayigwa bo bololo, kabuno bisa kwingil’ikilingo ikisu.” Polelo, linga ikipanga kya Kyala gwabumi kisakwingil’ikilingo ikisu, sikayapo nasimo isyakusofu sifisigwe ku kyene.

71 “Fyosa ifi Tata aambulile Une, Une mbabulile umwe,” alinkuyoba Yeso. Kangi abene balinkutoligwa ukummwitika Umwene.

72 Polelo mmasiku ga Abraham, mumo Umwene aakumbusyaga ku bene, Umwene alinkuyoba ukuti mumo Abraham aayobaga na Bandumi, kangi inyuma Yake yasanusigwe ku kihema, kangi Umwene alinkumbula Abraham Umwene ikunjatilaga umwene nu mwana. Kangi Sarah, nkati nkihema, alinkuseka. Kangi Umwene alinkuti, “Ngimba fiki Sarah aseki?” Ngimba Umwene abonesyaga fiki? “Ngimba fiki Sarah aseki?” Ukwene kwali sala panini itolo bo ukubongotola kwandile, akabalilo ikyo kikuboneka. Bo ukubongotoka kukaali, umoto gula gwasulwike ukufuma ku mwanya nukokya akaya kala, kangi ikimanyilo kila kilinkubombigwa.

73 Kangi Yeso alinkuti, “Umwene naloliloli mukusoba,” ku ba dokotala ba bwakyala abakulumba, ku kikolo ikiputiputi kuko naloliloli maelifu-elifu baali bitiki. Umwene alinkuti, “Umwe naloliloli mukusoba, kisita kumanya a Masimbo na Maka ga Kyala.” Ku ngulilo bo iyo, aba baali banyambala abamanyisigwe kanunu, aba baali basukulu kangi bakusisigwe nkipanga.

Akabalilo kako umwana apapigwege, umwene ali kyombo kya kipanga. Ugwe gwafimbilisigwaga ukuya Mw’Israeli. Amasiku mahano na matatu ukufuma pakupapigwa, ukwene kwali kubutigwa, kangi ugwe gwaali Mw’Israeli akabalilo kosa. Kangi ubuputi bwafumilaga ku banya Levi, aba bamanyisigwaga ukukindamo ifyinja bamia mu Masimbo. Palema isi Yeso alinkuti, “Umwe naloliloli mukusoba, kisita ukumanya a Masimbo!” Abene bagamenye agene ukufuma mwa buku gwabo bene ugwakumanyisigwa, abene balimenye iliyene ukwisila mwa ba katekisimu babo, abene balimenye iliyene ukwisila mu bufundakyala bwabo bwene. Loli Yeso alinkuti, “Umwe mukalimanya Ilyene, i Lisimbo, kangi mukagamanya a Maka ga Kyala. Linga umwe mwalimmenye Abraham, umwe angali mummenye Une. Linga umwe mwaali bana ba Abraham, umwe angali mummenye Une, kabuno Abraham alinkusekela akabalilo kako umwene aalibwene ilisiku Lyangu, kabuno umwene aliketile-nganila ilisiku. Akabalilo kako Une nimege pankyeni pake kunyuma kula, mu mbili gwa nyama, kangi nukubomba iki, umwene amenye ukuti ikyene kyaali yo Une, kangi umwene alinkungolela Une ‘Elohim.’ Loli apa Une ngubomba ikindu kilakila pankyeni pa umwe, kangi umwe mukungolela Une ‘Belezebabu.’”

“O,” abene babagile ukuyoba, “uswe tulinagwe Abraham ukuya tata gwitu.”

“Ukunkolela Abraham ‘tata’ gwinu?”

⁷⁴ Umwene alinkuti, “Fiki, uswe, uswe tuli kimo ni kipanga. Uswe twe kikolo kya bwiputiputi. Uswe twe bandu bakulumba. Uswe twe bandu ba Kyala!”

Yeso alinkuti, “Umwe yomwe setano, umwene yo gwisemwe.”

⁷⁵ Mbagile une ukufwanikisya ingulilo yila ku iyi, umwisyugu, akabalilo kako balipo naloliloli maelifu-elifu ga bandu aba bikwikolela Ubukristi, kangi bakamanya nakamo akakufwana na Kyala akakukinda mumo un’Hottentot abagile ukumanya isya kilo kya ku Igupti. Balipo abanyambala na bakikulu umwisyugu, naloliloli maelifu-elifu aba bikwikolela ukuya Bakristi aba bikwiyegele Kristi, bakamanya ulwalo lwakwanda lwa Maka ga busyuke Bwake, kangi bakagonjamo siku ubununu Bwake. Abene bakiipilikamo siku a Maka Gake. Amaso gabo gagogigwe ku Bwanaloli.

⁷⁶ Alinkuti, “Umwe mufwil’amaso, balongosi ba bafwamaso. Batisa . . . u . . . linga umfwamaso ikulongosya umfwamaso, ngimba abene batisakugwilaga nkibwina?”

⁷⁷ Polelo abene balinkwinogona, “Uswe twe Bakristi. Uswe twe bitiki. Uswe tuli nkipanga ikyapamwanya ukukinda fyosa ifi filipo. Aba rabi bitu bo bamanyisigwe ukukinda bosa aba

balipo.” Kangi palema isi Yeso alinkubabula abene ukuti abene bakamenye nukumanya a Masimbo.

⁷⁸ Keta Kyala afisiile ukufuma ku maso ga bamahala na bakomu, kangi nukusetula ikylene ku banike aba luko ulu lukumanyilaga? O, a Maka amakulumba kangi nubusitampaka bwa Kyala! Mumo Umwene ayilile ubununu ku bene aba bikulondesya ukwenda nubwikemo pankyeni pa Umwene! Umwene atisakufisaga nakamo akandu akanunu.

⁷⁹ Kangi ukuketa ilisiku ili akabalilo kako ikisu kyitu, ikisu kyapasi kyitu, kibwaapuligwe ni kindu kilakila!

⁸⁰ Yeso alondaga ukubagolosya abene nubutalusyo. Abene balinkuyoba, “O, Abrahama yo tata gwitu. Kangi uswe twisakuyaga mu Lwimiko, komma Ugwe ukupasya isya isyo, panongwa yakuti uswe tukwitika Kyala. Uswe twe bayobaji, kangi uswe tukwitika Kyala, kangi uswe tukumanyisya abandu bitu. Kangi yogw’ani Ugwe ukwisa ukusyungutila apa ni ki—ki kimanyilo ikyaiyolo ikisitakulinganisigwa nukugela ukukikolela ikylene Kyala? Ugwe ukaya nakimo loli yu Belezebabu.” Mwaketa umwe lelo, abene baali nifimanyisyo fyabo ni fipaguko fyabo.

Yeso ababulile abene, “Umwe yomwe setano.” Inogona isya ikylene!

⁸¹ Kangi une nguyifwanikisya ingulilo yila ku iyi, umwisyugu akabalilo kako uswe tulinago maelifu-elifu bikwingila ifipanga, uswe tuli nafyo bakalongo ba maelifu. Kangi Kyala ikwisa pasi ukwitugasya nkipanga Kyake kangi, nukubomba ifindu filafila ifi Umwene aabombile kula, ukwipela Mwene yulayula mmayolo, umwisyugu na bwila. Kangi abandu bikusanusya inyuma syabo ukufuma ku kyene, kingikingi, bamo ukubuka kubufumuke, bamo ukutila ukusala ulusalo. Ikyene kifimbilligwe ku bandu! Ugwe kufimbilisigwa ukusala ulusalo. Ugwe ukabagila ukwima pakati. Ugwe kufimbilisigwa ukuyoba “ena” pamo “umma.” Ugwe utisakusokaga pa kifigo kila mundu yulayula uyu aalingile nkati muno. Ugwe ukabagila ukubomba ikylene. Ugwe uli nalo ulusalo ukuti utendeke. Bomba ulwene kwa Kristi ulubunju ulu.

⁸² Abene binogonaga ukuti kilikyosa iki kyaali nkipanga kikupokigwaga. Yeso alinkuti, “Ikipata kyo kifinyu, kangi injila yo nsekele, kangi loli banandi bikuyangapo aba bikuyagaga iyene.”

⁸³ Unko mbasokege umwe ulubunju ulu, kipanga, mwandege. Ikyene kikwega akabalilo umwisyugu, mu ngulilo yitu iya bwikemo-bwatwibene, ubwakwiyikutisya-twibene ukwa busyobi mumo uswe tulimo nubumi. Isala iyakuti akabalilo kako abanyambala na bakikulu bikwima mfipanga kangi mfikota, nukwimba ingobelo sya Kyala, nukwenda ukusooka ukufuma ku kipanga kila nukukwesa ingambo, nukunwa kachasyo,

nukubuka ku fimogo, kangi—kangi ukwitugasya ku kisu kyapasi, nukuyoba isunga imbwapufu, isunga isyakinyanyasi, nukwikolela bene “Bakristi.” Akabalilo kako abanyambala na bakikulu babagile ukwenda ukufuma kukigemo pamo ukufuma kukupanga, kangi ukufuma ku buyo bwa Maka ga busyuke, kuko ikimanyilo kilakila ikya Mesiya ki kwendendeka pakati pa bene, kangi kisitakuya kipeligwa kipya mwa Kristi, kilipo kimo kitamisyeye. Akabalilo kako amanyuzi gabagile ukufumusyaya ikyene; nukufuma ku kiloboko ukubuku ku kiloboko, ukubuka nu kwisa, ukufuma ku buyo ubutalale ubwa Kululu ukubuka ku matengele gatolopiko ga Kwitongo, Kyala ikutuma ikyene, kangi abandu kingikingi bikusanusya inyuma syabo pa kyene. Polelo ngimba fiki ifi uswe tubagile ukuyoba, ngimba fiki ifi uswe tubagile ukubomba? Uswe tukusanukilaga ku Masimbo kuko Umwene aayobile, “Ikipata kyo kifinyu, kangi injila yo nsekele, kangi loli banandi balipo aba bisakuyagaga iyene.”

⁸⁴ Umwene alinkuti, “Mumo ukwene kwayiliile mmasiku ga Noa, momumo ukwene kwisakuyilaga mu Kwisa kwa Mwanundumiana gwa mundu.” Pilikisya, mmasiku ga Noa, ikisu kya pasi kyaali nu bwingi bwa bandu ukufwama mumo ukwene kuyilile umwisyugu. Ubumang’anyi bwabo bwaakindaga ubwitu. Abene bayengile abasifikinsi na ma piramidi nukubomba ifindu ifi uswe tukabagila ukubomba umwisyugu. [Ubuyo busitakandu pa tepi—Nsimbi.] Abandu abakinde, abakulumba, abakomu. Kangi kumbukilaga, ubumang’anyi bukuyoba umwisyugu, “Ukwene kusyele iminiti yimoyene bo kukukaya pakilo-pakati.” Ukwene kusyele iminiti yimoyene bo ikipimakabalilo kikakoma isala yakatikati. Ukwene kwilile ukukinda mumo uswe tukwinogonela. Une ngusubila ukuti i—ngusubila ukuti u Mbepo Mwikemo ikuyubikaga iki mu ndumbula ya mwitiki aligwesa, “bo mu mmasiku ga Noa”!

⁸⁵ Ngimba balinga aba bapookigwe mmasiku ga Noa, ukufuma ku ngulilo yila? Bahano na batatu, bahano na batatu ukufuma maelifu-elifu mingi. Umwene alinkuti, “Momumo kwisakuyilaga ukwene mu Kwisa kwa Mwanundumiana gwa mundu.”

⁸⁶ “Kangu mumo kwayilile ukwene mmasiku ga Sodomu, momumo ukwene kwisakuyilaga mu Kwisa kwa Mwanundumiana gwa mundu.” Ukukinda bakalongo ba maelifu, balipo batatu aba baapokigwe.

⁸⁷ Ugwe ubagile ukuyoba kwa une polelo, “Ndumbilili, kuyobaga fiki isya maelifu ga aba bikwisaga nu Mwene?” Lilino, nkundwe, abo bo babunganisigwe ukufuma mu ngulilo nyingi.

⁸⁸ Une ngwiswigaga linga abandu kalongo na babili babagile ukusokamo mu ngulilo iyi. “Ikipata kyo kifinyu, kangi injila yo nsekele, kangi loli banandi bisakuyaga aba bisakuyagaga iyene.”

⁸⁹ O, une mmenye ifipanga, ifi ifyene fikuyoba, “Linga ugwe kubika ingamu yako pa buku kangi kuyaga yumo mwa uswe, *iki*, ugwe uli kanunu.” Likayapo ni Lisimbo nalimo ilya luko ulo. Linga kilikyosa kili ni ngamu yake pa buku kangi mu—mu kipanga, bikuyangapo maelifu-maelifu-elifu ukolosyana na maelifu-elifu-elifu ukolosyana na maelifu-elifu-elifu, kilikyosa kikwingilaga. Kokuti uluko lwa mbepo syosa lukwingilaga mula, kangi lo luko luki ulwa kayilo Kumwanya kwisakuyaga mula? Inogona isya ikyene lilino.

⁹⁰ Mumo umunduyumo abagile ukuyoba kwa une, “Lilino gulila panandi, Nkundwe Branham. *Gwakuti-nu-gwakuti*, une mbilike abene bikuyoba mu ndimi, une mmenye abene bisakuponjola ikyene.”

⁹¹ Ikyo kitikusanusya ukuti abene bisakuponjola ikyene na panandi. Paulo aatile, mu Bakorinti Bakwanda 13, “Palema nalinga une nguyoba ni ndimi sya bandu na bandumi, kangi ngayanalo u lugano, une ndi gwaitolo.”

⁹² “O, une naabukile ku lukomano lwa *Gwakuti-na-gwakuti*. O, umwene aabombile imbombo ingulumba, isyamaka. Une ngetile umwene aapelile mfwamaso ukuketa.”

⁹³ Pope umwene aabagiile ukutagigwa. “Bingi bisakwisaga kwa Une mu lisiku lila nukuti, ‘Gwe Ntwa, ngimba une ngaalulumbilila mu Ngamu Yako, nsolwile? Ngimba, mu Ngamu Yako, une ngabopesya imbepo inyali? Ngimba, mu Ngamu Yako, une ngabomba imbombo ingulumba nyingi?’ Umwene isakuyobaga, ‘Sokapo pa Myangu, umwe mwe babomba butulwanongwa, Une ngabamanyamo umwe siku.’” “Ikipata kyo kifinyu, kangi injila nsekele kangi loli banandi bisakuyaga ngapa aba bisakuyagaga iyene.”

⁹⁴ Unko une mbapeko ubipime ubu bwisakubasenyenda umwe. Ukufwana nu bumang’anyi bwa fipatala, nkaya ka Chicago, ukufwana nu bubale bwa badokotala, ukuti kulipo ukusosya inyanda maelifu malongo matatu mu Chicago mwene, mmasiku malongo matatu, kuko aba dokotala bali nako. Ngimba tulipo utupilisi tulinga nutundu utu abene bikunwa, utwa kusosya nyanda?

⁹⁵ Ububale bikubonesya, mu United States, ukuti balipo abana abasiwana bingipo ukukinda aba balipo abana ba mbwegi. Ngimba mumenye ukuti i Libangeli lyaayobile, mu Kukumbusya 14:2, ukuti “umwana unsigwana, ukwene kukukindaga ifyinja bamia bana ukuti kila kyomoligwe”? Abana ba bana ba bana ba bana ba bana babo bakabagila ukwima nkilundilo kya Ntwa, ifyinja bamia bana, ingulilo kalongo. Ifyinja malongo mana mu ngulilo yimoyene. Umbuya mbuya-mbuya-mbuya-mbuya-mbuya-mbuya-mbuya-gwabo aali mwana nsigwana, umwene ali panja pa kyegelelo! Lilino tutiyi fiki? Nssolela une papo ikyene kyasanusigwe.

⁹⁶ Ngimba uswe tukwisa ku fiki? Kangi lilino abasigwana, panongwa ya bulogwe, kangi abakikulu abatulwanongwa bikufwala mu ngindi bafwanega banyambala, iki kyo mwiko pa nkyeni pa Kyala, abakwesa ngambo, abanwa mialwa, abikolela-bene ukuya Bakristi. Kyala kanisyaga ikubugutila kya luko ulu ulwa balogwe! Uko ko kotalusya. Ukufuma apo bikwikolela bene Bakristi? Yo nongwa Yeso aayobile, “Ikipata kyo kifinyu, kangi injila yo nsekele, loli banandi bikuyangako aba bisakuyagaga iyene.”

⁹⁷ Abene batisakwiyufyaga bene mma. Abene bakafundumbula. Keta, akabalilo kako Davidi abuliigwe isya bonangi bwake ubu umwene abobile, nakalinga umwene alikupinduka, kangi Kyala alinganile umwene panongwa ya ikyene. Ugwe kubabula abene isya butulwanonga bwabo, abene bikuyobaga, “Une ndisakwisapo pakifigo kangi umma.” Fiki? Abene bali nu buyo bwingi ubwakubukako, abene babagile ukubuka ku nyumba isyabusigwana sila isi sisakwitikisyanaga nu luko ulu. Loli akene ko kabalilo akuti abalumbilili bafwalege ifyabwite fyosa ifya Kyala nukulumbilila i Lisyu kisita kupepusyako, Inongwainunu. Abanyambala bikufimbilisigwa ukwilambika bene.

⁹⁸ Bukayapo ubwanalolindumbula pakati pa Bakristi kangi mma. Abene bikulonda ukuyoba, “Une ndi gwa Methodisti, Une ndi gwa Baptisti, Une ndi gwa Pentakosti,” ikyo kitikusanusya kwa Kyala. [Nkundwe Branham ikukuba ulobe lwake—Nsimbi.]

⁹⁹ “Une njobile mu ndimi, une mbobile ifika.” Uswe tukubika ubusito bosa pa ikyo, na papo ikyo kyo kindu kimo ikigogamaso ukukinda fyosa iki abene babagile ukubomba. Naloliloli. Ifula yikugwa pa bagolofu ukufwana itolo pa baniongafu. Ifula yikutima pa fibyaligwa ukufwana itolo mumo iyene yikutima pa lisu, Roy. Ifula yilayila, u Mbepo Mwikemo yulayula ikugwa pa bandu. Ikyo pope kitikusanusya... Ubupeligwa bwabo bukufimbilisigwa ukuya bukindane, ukufuma nkati ukwisa panja. Somma ukubonekela kwa panja mma pamo ububombelo, loli u Mbepo gwa nkati ugwa Kyala gwabumi ikyo kyo kikupela umundu ukuya kipeligwa ikipya, ikyo kyo kikulambika indumbula yake pamo indumbula yake pankyene pa Kyala.

¹⁰⁰ Ugwe kuyoba, “Ndumbilili, ugwe kusanusya ukumbula une ugwe kwilamwa kalongo na babili ukufuma maelifu-elifu aba kangi abandu maelifu-elifu-elifu mana mu kisu kya pasi?” Une ngwilamwa linga abene bisakuyangapo kalongo ba babili aba bisakufwanikisya ukubuka mu Bunyakiligwe. Inogona isya ikyene! Une ngubabula umwe isi Yeso aayobile apa mu Nongwainunu. Inogona isya ikyene!

¹⁰¹ Ngimba ikyene kifikile poki? Panongwa yakuti ubulogwe bwaafikile nkati mbandu, abana abasigwana balinkwanda

ukupapigwa, ikyo kikoomola abene. Muketile, uswe tubagile ukwima apa ku sala nyingi, ukufibika ifindu ifyo, kangi ugwe ubagile ukuketa ukuti uswe tukwitugasya mungulilo ya bandu ababole, abagunigwe, ababole-ku-kikolo. Yo nongwa abene batikufibona ifimanyilo, yo nongwa abene bikutoligwa ukupilika Inongwainunu, abene bakafundumbula, palema nalinga biputiputi itolo kangi baakipangapanga.

¹⁰² Ngimba Yeso akaayobile ikyo, “U Mbepo ikuyoba pabwelu itolo, mmasiku gabumalikisyo abene bisakuyaga bammitu, baminogono gapamwanya, bagana ifyakusangalusya ukukinda bagana Kyala, basitakusubiligwa, bamatata, bapelalutende, kangi bafuyulaji ba bandu banunu, ukuya nu buboneke bwa bunyakyala?” Muketile? O, ugwe ubagile ukulalata, naloliloli. Ugwe ubagile ukuyobela mu ndimi, naloliloli. U lwitiko lwisakubopesya imisetano, naloliloli. Loli ikyo kikaya iki uswe tukubala'mma.

¹⁰³ Polelo ugwe ubagile ukuyoba kwa une, “Nkundwe Branham, ngimba ubupime bwa Nkristi bo fiki? Ngimba ywani isakupokigwaga? Ngimba ugwe kwisakupokigwaga, Nkundwe Branham?” Une ngubika isyo mmaboko ga Kyala. Une ngamanya. Une ngwitika ukuti une mbokiigwe. Une ngufwanikisya ubumi bwangu, bwila, ni Lisyu. Linga ubwene butikufwana ni Lisyu, polelo kilipo kimo kitamisyey, une ngufimbilisigwa ukugomokela nukutendekesya.

¹⁰⁴ “Ena,” kuti, “Nkundwe Branham, akabalilo kako abandu bikuyobela mu ndimi, ngimba ikyo kitikusanusya ukuti abene bapokigwe?” Umma, nkulumba! Umma, naloli! Une mbilike abalosi abanyambala na balosi abakikulu bikuyobela mu ndimi, uluko losa lwa fyabutoyofu. Une mbabwene abandu bikuyobela mu ndimu nukwitugasya nu nkasi gwa nnyambala uyungi. Une mbabwene abandu bikuyobela mu ndimi, kangi ukunyela-nyela nu kulalata ukufwana inyumba yili pa moto, kangi nukusoka kangi nukubomba amagendo, nukuhiya, ukuyoba ubusyobi, ni findufyosa. Ngimba ugwe kugulilaga ikyene bulebule? Umma, nkulumba.

¹⁰⁵ Ukuya ba kipanga, nkulumba gwa kipanga, bakipangapanga mumo abene babagiile ukuyila. Fiki, ugwe ubagile ukwinogona abene babagile ukuula amafuta ga ligali pa Ndungu? Umma. Loli pa Kilembelo bikubomba ikindukimo ikyakinyanyasi kangi ikibolano kangi ikyapasi-fiyu. Kyala ikwitugasya mu ndumbula, komma panja, ikyene kyo kindukimo ikifumila mu ndumbula.

¹⁰⁶ “Ikipata kyo kifinyu, kangi injila yo nsekele, kangi banandi bisakuyangapo aba bisakuyagaga iyene.” Mumo kwayilile mmasiku ga Noa, bahano na batatu ukufuma maelifu-maelifu bala; mumo ukwene kwayilile mmasiku ga Sodomu, batatu ukufuma maelifu-elifu; momumo ukwene kwisakuyilaga pa kwisa kwa Mwanundumiana gwa mundu.

¹⁰⁷ Kangi umwe mukuketa ububole ubu uswe tulimo. Umwe mukuketa mumo aminogonelo galigosa, umundu, umwene ikusooka panja pala kangi setano ikutendeka abalumbilili abakomu ukwima pa kigemo nukubitikisya abandu bapubisigwege pakyene.

¹⁰⁸ Ilisiku limo umundu yumo alinkuti, “Une ngabagila ukukutwala ugwe pa kigemo kyangu, ugwe ubagile ukupela abakikulu bangu ukusyuta imitu.” Umma, abene bali mu njila yila itolo. Ikyene kikubatwala abene ku minogono amagolofu, ukubabula abene balekege ukufwala imyenda igi ni findu. Kangi, ena, umunduyumo ikufimbilisigwa ukubomba ikyene.

¹⁰⁹ Une ndinkuyoba ku nkasi gwangu, “Ngimba une nsyutil’untu, nimwene? Ngimba une nsyutil’untu? Pamo, kitamisyе fiki na une?” Ikindukimo nkati kikabagila ukuya kimyemye. Une ngufimbilisigwa ukuyoba Ikyene, une ndikupasya iki aligwesa ikuyoba.

¹¹⁰ Alinkuti, “Ugwe kuyapakonanga ubutumigwe bwako.” Ena, ubutumigwe bosa ubu Inongwainunu ikonangaga, bukufimbilisigwa ukonangikigwa.

Kyala atupege uswe ubukifu ukwima ku iki kyo Bwanaloli nukuyoba u Bwanaloli ukufwana ni kyene! Ubwene bo butulwanongwa, kikosyasoni!

¹¹¹ “Ikipata kyo kifinyu,” alinkuyoba Yeso, “kangi injia yo nsekele.” Kangi umwe mwe mukwinogona ukuti amaelifu-elifu, kangi mwesa mwe baMethodisti, baBaptisti, baPresibeteri, baPentekosti mukwingila nkati, umwe mwisakusyobigwaga ilisiku lila. Yeso aayobile, “Bingi bisakwisaga nukwitugasya Nkitangalala, nukuti, ‘Une ndinubwabuke ukuya kuno.’” Umwene aatile, “Loli abana ba Kitangalala bisakubatagaga abene panja. Kwisakuyangako ukukuuta nukulila nukusya amino.” Ukwene kununupo ukwisasania ulubunju ulu, Nkristi. Bisakuyangako kalongo ukulosya na maelifu-elifu ukolosya na maelifu-maelifu-elifu aga Bakristi abikolele, kangi bumilisi mbumi bwabo, aba bisakutoligwa ukukyaga ikipata. Yeso aayobile bo ulu.

“Balinga aba bikwingilaga nkati?”

¹¹² Une ngamanya balinga aba bikwingilaga. Ikindu kimokyene kyo, “Kyala, unko njege yumoywene gwa bene!” Ikyo kyo momumo. Umwene yo Ndongi. “Unko njege yumo.”

¹¹³ Ugwe kuyoba, “Nkundwe Branham, ngimba ugwe kumanyaga bulebule akabalilo kako u Nkristi?”

¹¹⁴ Une ngamanya. Loli unko une mbabule umwe iki i Lisimbo likuyoba. Naloliloli umwe mukwitika Ilyo. Akabalilo kako u Mbepo Mwikemo aatumigwe ku kisu, Kyala alinkuyobela mwa Mbepo Mwikemo. Umwene alinkutuma ugwandumi panja—panja, tasi. Kangi Umwene alinkuti, “Buka ukukinda nkaya

kangi nkati mbandu, kangi bika ikumanyilo pa fipulilo fyabo, ifya abene aba bikwilumbusya nu kukuuta panongwa ya butulwafyamwiko, ukutendekesya ifindu ifyo.”

¹¹⁵ Ngimba ikya mwiko kyo fiki? Unkikulu uyu isakufwalaga imyenda igi gibagilile unnyambala. Ikyene kikupela Kyala ukuya mbine. Ngimba ubuukilemo kifuki kuko ikindukimo kyamwiko? Mumo ikyene kikukupela ugwe ukuya mbine! Ugwe ukubagila ukwimikana nakyoy. Unkikulu uyu isakufwala umwenda ugu gubagilile unnyambala, umo mo mumo Kyala ikwipilikila; ugwe ubagile ukwimba mu kwaya, ugwe ubagile ukwiputa ilisiku lyosa, kangi ukulalata ilisiku lyosa, pamo ukwitugasyila Kyala ilisiku lyosa, ugwe utagiigwe Nkuyapo kwa Kyala. Ikyo kyo katikati iki i Lisimbo likuyoba. “Ikyo mwiko!” Kangi bosa aba bikukolekesya ikya luko ulu bisakuyaga lubafu lumolwene nu luko ulu.

¹¹⁶ Kyala tupaga uswe ilipyana ukulwana nu luko ulu. Linga ugwe kufimbilisigwa ukwima pa gwimwene, ima pala kangi kolelela i Lisyu lya Kyala nkiboko kyako. Ilyene litisakutoligwamo siku.

¹¹⁷ Lilino uswe twisile ku lisiku, kuko, ikyamwiko kya bandu. Kangi u Gwandumi yo abukile panja ukumyatika kangi. Nyagila une umundu yumoywene mu Jeffersonville, linga ugwe kulonda ukumanya uyu isakuponjolaga ikyene, nyagila une umundu yumoywene nkaya kitu uyu ikwilumbusya kangi ikukuuta, bwila ikupasya kangi akatele, kangi ikwiputula isyamwiko isi sikubombigwa nkaya. Ngimba ugwe ubagile ukufyusya ikiboko kyako kangi nukukibika ikyene pa mundu yumoywene? Polelo ega i Lisimbo ili, “Ikipata kyo kifinyu, kangi injila yo nsekele, iyi yikulongosya ku Bumi, banandi bisakuyaga ngako aba bisakuyagaga iyene.” Abo bo bene aba bisakumiatikigwaga.

¹¹⁸ O, une mbagile ukubabonesya umwe bingi aba bikubuka ku kipanga. Une mbagile ukubabonesya umwene bingi aba bikwimba mu kwaya. Une mbagile ukubabonesya umwe bingi aba bikumanyisya isukulu ya Ndungu. Une mbagile ukubabonesya umwe bingi aba bo bakulumba ba—ba fibugutila ifikulumba. Une mbagile ukubabonesya aba bikulalata, bingi aba bikuyobela mu ndimi, bingi aba bikubombela mu mbombo sya Nongwainunu.

¹¹⁹ Loli mbonesya une yumoywene uyu pasi mu ndumbula syabo bikutamigwa panongwa ya bonangi bwa kisu! Mbonesya une undumbilili yumo uyu abagile ukwima umwisyugu nukukemela ifipaguko fila. Mbonesya une undumbilili yumoywene uyu isakwimaga nukuyoba ifindu, kangi ukukemela ifipaguko fila. Umwene kinunupo angabombaga, umwene ikusosigwa ngamo, ilyo litikiti lya kyakulya kyake.

¹²⁰ Yo nongwa Billy Graham aalimbulile Jack Moore, alinkuti, atikuketa ingomano nyingi isi sikwima, alinkuti,

“Umwene akaya m’Baptisti, kangi akaya m’Methodisti pamo m’Pentekosti.” Alinkuti, “Bosa ba abene bikulwana nu mwene.” Naloliloli, une ndikuyoba ikyo. . . Inongwa iyi une njobile, une ngabagila ukuyoba ikyene pa kilundilo. Une nguyoba ikyene nkipanga kyangu kya nimwene. Une ndinako ukusukulika, panongwa yakuti isala ya lugelo yili pa une.

¹²¹ Abene bikuyoba, “Linga ugwe kwisaga, ukwene kukuyaga kanunu, loli komma ugwe ukuyoba nakimokyene ikya Kila.” Ugwe po kifwene itolo ukusita kuyoba.

¹²² Une ngulumbililaga kikyoo Kyala ayobile ndumbilile! Uko ko kutalusya. Yumo mwa bahano na batatu bikuyangapo pa buyobumo. Yumo mwa bene ikuyangapo pa buyobumo. Loli pisiku lila une ndikulonda ukuya ntobesigwe panongwa ya kuyoba ukuti une napepwisyeke panongwa ya kimanyilo kimo pamo ikimanyisyo kya kipaanga kimo, pamo ikipaguko kimo. Une ndumbilile u Bwanaloli!

¹²³ Abene bikuyoba, “Ngimba fiki ugwe, ngimba fiki ubutumigwe bwako, Nkundwe Branham, ubu bukuboneka ukuya bukulumba fiyo, ngimba fiki ubwene butikusaata paliposa bo banyambala abangi bikubombela?”

¹²⁴ Ubo bo bwanaloli papapo. Ubo bo ubo. Une ngubuka nkaya, ngimba mukwinogona ukuti aba Assemblies of God bikwitikisaniaga na une? Komma ku ifi une ngwitika, abene batikwitika. Mbagile ukukoleligwa kamokene mu kabalilo. Ngimba mukwinogona aba Methodisti babagile? Gela, kangi mukusyaganiaga. Yaga ntendekesi gwangu pa ndungu gumo. Linga ugwe kwingila, ugwe kwingilaga mula mu Ngamu ya Yeso. Uko ko kutalusya.

¹²⁵ O, ena, abene bikukubika ugwe kula, naloli, bikukubika ugwe kula pa bumo mu buyo, kangi ukuti ugwe ukabagila ukukolelelana na bene mu njila yiliyosa bo ulu. Kangi polelo akabalilo kako ugwe kusokako, bikuti, “O, lilino, Nkundwe Branham mu luko lumo asyutitem’untu panini itolo, umwe mumenye. Umwene. . .”

¹²⁶ Linga une nsyutitem’untu, kokuti i Libangeli lisokilepo pa Kimanyisyo. Ifyo fyo ifi i Libangeli liyobile! Ena, nkulumba. Ketesya!

¹²⁷ Yeso aatile, “Ngimba fiki umwe mukungolela Une ‘Bezebabu’? Umwe mukwitika mwa Solomoni, ikimanyilo kyake ikya kumany’indumbula. Umwe mukwitika ilisiku lyake. U Nakamba gwa Kwitongo aalisile ukufuma ku mbafu syabumalikisyo bwa kisu, ukwisa ukukibona ikyabupi kila, kangi umwene alinkwitika ikyene akabalilo kako umwene akibonege ikyene. Kangi umwe mukwitugasya kangi mukukibona ikyene ilisiku lyosa, kangi mutikukyitika ikyene mma.”

128 Kangi abakundwe Bake Mwene balinkusita kumwitika Umwene. Alinkuti, “Umwe buka kula ku lusekelo,” Umwene alinkuti, “loli Une ndikubuka kula lilino mma.” Umwene alinkubuka kula injila iyingi, panongwa yakuti abakundwe Bake Mwene bakalimwitike Umwene. Uko ko kotalusya. “Ikipata kyo kifinyu, kangi injila yo nsekele, kangi loli banandi bikuyangapo aba bikuyagaga iyene.”

129 Akabalilo kako kilinkwisa ku bafundigwa, ukubonesya, ngimba abene baafikile poki? Unkikulu nu nnyambala baliimile pa kipingika nu Mwene, Yohani na Maria. Abangi bosa ba abene bakindile.

130 Uku ko kubonesya. Aka ko kabalilo. Ako ko kabalilo kako Kyalala ikubomba ifindu. Aka ko kabalilo aka Mesiya ali pa kisu kya pasi. Aka ko kabalilo aka a Maka ga Kyalala gikuguta mbandu Bake. Kangi abene bikubakolela abene “bikemo-babunguluka, batoyofu, basyut’untu,” o, uluko lwa ifyo. Loli isala ili apa!

131 Bwisakuyangapo naloliloli ubusulumanie ubunywamu bumo ku bulongi.

132 O, unnwakachasyo, umwene amenye kuko umwene isakuyaga pa bulongi. Momumo yope unnwakipumu amanyile kuko umwe isakuyaga. Momumo yope un’dogwe amenye apa umwene isakwimaga. Momumo yope unkomanjuga amanyile apa umwene isakwimaga. Momumo yope u kinwelwa amanyile kuko umwene isakwimaga. Umwene atisakusulumania mma.

133 Loli kuko abasulumanie bisakuyaga, bo bala aba binogonaga ukuti abene baali batalusye. Kula ko kuliko ubusulumanie. “Akabalilo kako abene balinkwima kula, balinkuti, ‘Naloliloli, uswe twasoosisye imisetano mu Ngamu Yako. Uswe twe balumbilili. Uswe tukubuka ku fipanga fyakuti-ni-fyakuti. Uswe tubombile ifiswigo. O, uswe twaalumbilile! Fiki, une naali—une naali n’gulilakipanga. Une naali bishopu. Une naali *iki*.’ Sookapo ukufuma kwa Une, umwe babomba butulwanongwa, Une ngaabamenye nukubamanya umwe mma.” Mwaketa lero. Ubo bo busulumanie. Umwene alinkuti, “Abana ba bana babo bisakwingilaga nukwitugasya n’Kitangalala, nukuyoba, ‘Uswe tuli nu bwabuke ukuya kuno,’ kangi abene bisakutagigwaga mu ngisi panja, kuko kwisakuyako ukulila nukukuuta kangi nukusya kwa mino.” “Ikipata kyo kifinyu, injila yo nsekele, iyi yikulungosya ku Bumi, banandi bisakuyangako aba bisakuyagaga iyene.”

134 Kya umwe, mwe bandu bangu abapala, ulubunju ulu, pilikisya ku iki. Une ngasipela isi umma. Une iyi yo mbombo yangu ikubabula umwe Ikyene. Iki kyo fyosa ifi une ndinayo inongwa. Linga une ngalumbililamo siku ubulumbilili ubungi mbumi bwangu, ubo bo Bwanaloli: bikuyangapo itolo abandu banandi bapokigwe. Kumbukilaga itolo ikyo: itolo banandi fiyo. Uge uyege yumo gwa bene.

135 “Ngimba bo baliku, Nkundwe Branham?” Une ngamanya mma. Akayapo uyungi uyu amenye. Uswe tukumbombela imbombo ubupokigwe bwitu nu lutende nu kutetema.

136 Loli ugwe uyege gwakugoloka na Kyala. Linga indumbula yako yitikukung’usya ni Libangeli, kokuti kalipo kamo aka katamisye, kalipo aka katamisye. Kali ikipanga kyako kikuyoba fiki, ugwe ukabagila ukwingila na ikyo. Ugwe kufimbilisigwa ukwingila na iki Kyala ayobile. Uyu yo Buku uyu ugwe kwisakulongigwaga ukufuma mumo, i Libangeli. Itugasyaga ni Lyene!

137 “O,” umwe mukuyoba, “ena, une nosigwe mu Ngamu ya Ntwa Yeso.” Uko ko kotalusya, ilyo lyo Libangeli. Loli linga ubumi bula butikukonga ukwene, ukwene kukaabombile ubununu bwingi ukuya mosigwe.

138 Ugwe kuyoba, “Ena, une nambilile u Mbepo Mwikemo.” Ikyo kyo kinunu, ikyo kyo iki ugwe kufimbilisigwa ukubomba. Loli linga ubumi bukaya nkati mula!

139 Kumbikilaga, ilisu likwambilila amaka galagala aga gikugwa pa ngano ukutendeka ukuti iyene yikule, yikutendeka ukuti ilisu lilalatege, lyope. Akalisu akaiyolo kikwima mmwanya kangu itolo ukuya kasangaluke mumo ingano yiyilile. Uko ko kotalusya, ukuyanubumi nu bumi bulabula. Kangu utulwanongwa abagile ukwitugasya mu Kuyapo kwa Kyala, ukulalata ubuponjoli, kangu nukwiyikasya bo yu Mukristi. Loli linga kikayapo ikindukimo ikikindane mu ndumbula! Umwene abagiile ukuya na Maka galagala ukubopesya imbepo innyali. Yeso aayobile lululo. Umwene abagile ukulumbilila Inongwainunu kanunu itolo bo balumbilili bangi babagile ukubombela. Isyo syo katikati isi, Yeso ayobile mumo. I Libangeli likumanyisya ikylene. Ena, nkulumba. “Palema nalinga nguyobela mu lulimi lwa bandu na bandumi, palema nalinga ngwiyipa umbili gwangu ukokigwa ukuya kyabupi, une ngupa ifyombo fyangu fyosa ukulyesya abalondo, une— une ndi nu lwitiko ulwakuguta ifyamba, une ngubomba fyosa ifindu ifi, une ngulumbilila mu Ngamu Yake, une ngubopesya imisyetano mu Ngamu Yake,” umwene alinkuti, “Une ndi waitolo.” Polelo, umwene aabagile ukubomba ikylene, loli “waitolo.” Mukupilikisya ifundo?

140 Lilino, ikindu kyakubomba kyo iki, ukufuma mu ndumbula yako, yaga Nkristi, lilino ingilaga mumo pa kipata ikifinyu. Kabuno, mbapate injila iyi yikulongolela ku bonangiko, kangu maelifu-elifu ga maelifu-elifu mu ngulilo ya bitiki iyi yikwingilaga kula. Panongwa yakuti, ikipata kyo kifinyu, kangu injila yo nsekele, itolo ugwe na Kristi mwibene.

141 “Injila yo nsekele iyi yikotalula ku Bumi, kangu banandi itolo aba bisakuyangapo aba bisakuyagaga iyene.” Lilino, aga go

Masyu ga Ntwa gwitu. Mwe! Ngimba Umwene aabombaga fiki? Imile pala, ikumanyilanganila aminogono gabo.

¹⁴² Kangi umwene aatile, “Umwene yo Belezebabu. Ena, Umwene ikuyaga Kyala bulebule? Umwene yo Nnyambala! Ngimba amahala aga gaafumile kugu?” abene balinkuyoba nkaya Kake Mwene.

¹⁴³ Akabalilo kako ugwe kwenda nukwingila nkaya muno, ukwene kukuboneka ukuya... Une ndikuyoba iki kisitaluyindiko kwa umwe bandu; umwe mwe Bakristi, umwe munganile une. Ugwe kwenda ukwingila nkaya apa, kangi kukuboneka ukuya amaka ga Setano gikugwisya ugwe pasi. Ubuyo ubu butagigwe. Akaya aka katagigwe.

¹⁴⁴ Ngimba u Billy Graham aayobile fiki akabalilo kako umwene ingilege mu Louisville? Umwene aayobile ukuti bula bo “buyo ubwamaka-gamisetano ukukinda mosa” umwene aaketilemo mbumi bwake. Ukubika ikylene mu nyuzi, alinkuti, “Ugwe ubagile itolo ukwipilika ukukubilwa ukufuma kwa mohesi.”

¹⁴⁵ Ena, une nabagile ukwipilika ukwene. Fiki? Aka ko kaya kangu. Akabalilo kako Yesu alinkugomokela ku kaya Kake Mwene, Umwene alinkuyoba imbombo ingulumba nyingi isi Umwene alinkutoligwa ukubomba, panongwa ya kusitakwitika. Alinkuti, “Unsololi akaya nsita gwakuyindikigwa, u ndumbilili, pene papo ukwene ko ku kisu kwake mwene—kwake mwene, pakati pa bandu bake mwene.” Muketile? Ugwe ukabagila ukubopa iki, i Lisimbo liyobile lulalula. Muketile?

¹⁴⁶ Lilino, akabalilo kako ugwe kwenda ukwingila nkaya aka! Kangi komma ukumbula une ukuti une ngabagila ukumanya. Une ngusegelela ku bandu aba bikumbonia pa kiboko nukuti, “O, Nkundwe Branham, une nguganile ugwe.” Kangi ugwe umenye ukuti ubo bo butungulu! Ugwe umenye ubo bo butungulu. Linga Kyala abagile ukumbula une ukumanyilanganila indumbula, fiki Umwene akabagila ukumbula une ikyo?

¹⁴⁷ Naloliloli, kangi mulamula pakati pa bandu bako gwimwene ukusyungutila akaya! Akabalilo kako abene bikukubona ugwe, bikuti, “Ena, ugwe umenye, une ngetile ikyakuti-kyakuti . . .”

“Kugu? Ikyene kyaali kugu?”

“Ukufyuka kula . . .”

“Ha! Uswe tumenye imiana yula!”

¹⁴⁸ Ugwe kwipilika ikylene. Unko une mbabule umwe, umwe mwikisya umundu yumo ise ku nyumba yinu uyu atikubagana umwe fiyo mma, itugesye mu nyumba yinu itolo akabalilo kanandi kangi ipilikaga ukwipilika ukuhesya kula. Gwandisye ikyo kingikingi maelifu kalongo na mana lilino, polelo umwe mukupilikisya iki une nguyoba. Polelo ugwe kwisa mbuyo

kuko aligwesa akuganile ugwe, ukwipilika kwa ofwa kula, itolo, o, mwe, kangi ugwe ubagile ukwitugasya kula itolo bwila, muketile. Apo po loli, muketile, ugwene go mbepo. Kangi abandu batikumanya ukuti ikylene kyo fiki, abene bikuswiga fiki abandu babwapuligwe fiyo.

¹⁴⁹ Ngimba fyo fiki fikupela abakikulu abanunu, iki kikupela abakikulu abanunu ukufwala imyenda ugyabulogwe nukusooka panja pala? Ngimba fiki fikupela, pope na lilino akabalilo kako ukwene kutalele, abalindwana abanini aba fyinja kalongona-fihano-na-kimo, afwele imyenda igi umwene akabagila nukufwala pankyeni pa mama gwake, kangi panja pa lukindi? Iyene yo nongwa yakuti, komma umwanike yula (umwanike yula akamanya kanunupo mma), loli panogwa yakuti undumbilili yumo nkigemo atoligwe ukukolelela ikikota kya mbombo yake. Uko ko katikati kotalusya. Naloliloli. Abakikulu bikwisa ndukindi, kangi bafwele-mbulogwe ni findu ifingi bo ifyo, kangi abatulwanongwa bikuketa ku bene kangi atikumanya ukuti umwene naloliloli itolo ntobesigwe ukufwana ukuti umwene alogwaga nu nnyambala yula. Yeso aayobile isyo! Yeso aatile, “Aligwesa uyu ikuketa ku nkikulu ukunnyonywa umwene, atalile abombile ubulogwe ni mwene mu ndumbula yake, kangi isakwamulaga panongwa ya ikylene pisiku lya bulongi.” Ikipata kyo kifinyu, kangi injila yo nsekele!

¹⁵⁰ Une mmenye umwe mukwinogona ukuti une ne miana unkafu. Une ngaya nkafu mma! Une ne nkundwe gwinu, kangi une mbaganile umwe.

¹⁵¹ Bopa ku bugasi ubu bukwise! Buka ku kipingika nu kukuta mpaka indumbula yiisusigwe nu Mbepo Mwikemo, uyu isakukusindisyaga inyuma ukufuma ku filifyosa ifya nkisu, nukwenda mbunyakyala pankyeni pa Umwene, ni ndumbula yako yikwaka panongwa ya Umwene. Ulugano! Komma mbombo. Kristi akaya mbombo, ukumbombela Kristi, ulwene lo lugano ulu lukumbombela Kristi. Ikyene kikukwabisanira ugwe, kikufimbilisa ugwe, mpaka ubukung’usye bwa bumi bwako bukukung’usya nayu Mwene. Ako ko kabalilo kako ugwe kububona ubutulwanongwa.

¹⁵² Kangi Umwene akutile pa kisu kya pasi. Ukwene kwalinsulumanisye Kyala mmasiku ga Noah, akabalilo kako Umwene aketege indumbula. Kangi Yeso alinkwitugasya pa kyamba, kangi alinkuti, “Yerusalemu, Yeresalemu, kingikingi mumo Une angali ngufugatile ugwe, loli isala yako yifikile kangi inyumba yako yisamigwe.”

¹⁵³ Momumo ukwene kwisakuyilaga pa Kwisa kwa Mwanundumiana gwa Kyala, indumbula ya mwitiki ugwabwanaloli yibongotoligwe. Umwene ikuketa lilino pabagile ukuyapo ulusasanio lukupyagila ikisu iki. Lubagile ukuyapo bulebule ukwisila nkibugutila kya basigwana? Ulwene lubagile

ukuyapo bulebule, akabalilo kako abene batobesigwe ukwanda nukwanda?

¹⁵⁴ Ikitangala kya Kyala kili bo unnyambala uyu aasopile ulwelo mu nyanja, kangi, akabalilo kako umwene atwalaga ulwene panja, umwene aali na bakayamba abanywamu, utwakayamba utunini, injoka, ifyula, niswi simo. Akaali mwene ukutumula syo siliku, umwene aasopile itolo ba kiloboko. Ikyo kyo iki Inongwainunu yikubomba. Ikyo kyo Billy Graham, Oral Roberts, na nimwene, nabalumbilili bosa abangi aba bikulumbilila Inongwainunu, bikusopa iyene panja, ukukwabila iyene nkati, “Bo aba abene, Ntwa.” Loli uswe tukubomba fiki akabalilo kalikosa? Uswe tukusyagania, bo ugwe ukali ukagomokela kangi, abene bagomokile nakalinga itolo mmisi kangi. Ngimba iki kyo fiki? Kukubwandilo, umwene aali yo kayamba unnywamu. Ikyo kikalinsanwisye umwene mma, ukukoligwa mu lwelo lwa Inongwainunu. Umwene aali yo kayamba unnywamu kukubwandilo. Umwene aali yo kayamba innini kukubwandilo. Umwene aali yo njoka kukubwandilo. Umwene aali nsyobi bo umwene akali akisa nkipanga. Umwene akaali nukulondesya nakumo ukubuleka ubwakinwelwa nukukoma injuga, kangi ukukwesa nubusyobi, kangi ukuhiya. Umwene aalisile itolo panongwa yakuti aatilaga gahena. Ugwe kwipela gwimwene ukuya gwakugehena ugwakongelelapo, akabalilo kako ugwe kubomba ikyo. Ubo bo bwanaloli. “Ikipata kyo kifinyu, kangi injila yo nsekele, kangi banandi bikuyangapo aba bisakuyagaga iyene.”

Unko uswe twipute.

¹⁵⁵ Gwe Ntwa, o, ndondesya une, gwe Ntwa. Longa inongwa yangu lululu ulu, gwe Ntwa. Komma ukunyitikisya une ukufimbilisigwa ukwisa ku bulongi pankyeni pa Ugwe, ukufuma pa kulumbilila mu njila iyi. O, linga kalipo akanyali kalikosa mwa une, gwe Ntwa, sosyamo akene, mbelile! Uswe tukuketa ilisiku ili tukwitugasyamo, akabalilo kako abanyambala na bakikulu bandile ukuya bumilisi fiyo. Abene bali ni soni. Ugwe gwayobile akabalilo kamo, “Kukayapo nukuya ni soni nkati mwa banabalindwana ba Sioni.” Ubwifyusi bwabo bwegigwe fiyo ukufuma kubene mpaka abene batikuya nisoni nukuya nisoni kangi mma. O gwe Ntwa, inogona isya ikylene! Kangi manyaga ukuti ikipimilo-kabalilo kwisilya kikung’usya kubumalikisyo, itolo iminiti pamo mabili ukongelelapo, kangi ukubongotola ukukulumba kukwisaga, polelo uyu mbwapufu ayege gwakukindilila mbwapufu.

¹⁵⁶ Kyala, ikutusumusya twesa ulubunju ulu. Senyendaga uswe, gwe Ntwa! Uswe tukuketa ifimanyilo fikuboneka. Uswe twigwile amaso gitu ukuti tumanye ikyo. Uswe tukuketa maelifu, maelifu, gwe Ntwa, aba basindile inyuma syabo nukuyonga. Une nguswiga, ngubombaga kiliku une,

ngubombaga kiliku une, O gwe Ntwa? Ngimba kilipo ikingi kimo, gwe Ntwa? Linga ikyene kikulondigwa ukulumbilila kwingipo, ulwiputo lwingipo, kilikyosa ikingipo, ndula une, gwe Ntwa, ukuti une mbagile ukutwala i Ndumi ku bandu. Ngimba mbagile ukubomba kiliku une? Loli abene bikukindilila ukukikana Ikyene. Ugwe kubomba ifika Fyako ifikulumba kangi kubomba ifiswigo Fyako ifikulumba, kangi pope abandu bikukindilila nkyeni mumo. Ngimba ilyene lyo Lisimbo Lyako ili likufimbilisigwa ukufwanikisigwa, ngimba ko kabalilo kakuti, “Nayumo umundu abagile ukwisa kwa Une pene papa Tata Gwangu ikuntwala umwene, kangi bosa aba Tata ambele Une bisakwisaga kwa Une”? Gwe Ntwa Kyala, tupaga ulubunju ulu ukuti abandu bisakusumukaga nukuketa ikimanyilo kyabumalikisyo iki ikya ku kisu kya pasi. Une ngusuma, Kyala, ukuti Ugwe kupaga ikindukimo ku bandu.

¹⁵⁷ Sayaga abandu banini aba apa ulubunju ulu. Kyala, andaga nu Nkundwe Neville, gwe Ntwa. Polesyaga umbili gwake. Umwene mbine ulubunju ulu, gwe Ntwa, ukubaba munda. Une ngusuma ukuti ikiboko Kyako ikyabubumbulusyo kikuyaga pa mwene. Sasaniaga umoyo gwake.

¹⁵⁸ Kyala, bukaga nkati mwa lukomana ulu. Balipo abanyambala na bakikulu bitugesye apa aba une lumo ndisakubabonaga kangi mpaka pisiku lila ku bulongi, akabalilo kala une ngwisakufimbilisigwaga ukwamula. Loli une mfundile mu Lisyu Lyako, “Ikipata kyo kifinyu, kangi injila yo nsekele, kangi loli banandi bisakuyangapo aba bisakuyagaga iyene.” O gwe Ntwa, itikisyaga iki ukuya bala “banandi,” bamo mwa bene, kubombaga isyo Ugwe, gwe Ntwa? Tupaga ukuti umundu aligwesa apa.

¹⁵⁹ Une ngwiputa mumo umundu aabagile ukwiputula itolo. Gwe Ntwa, abandu aba babagile ukumbombela une ikindu kilikyosa, nukufika pakundula une. Linga une naali ni njala, abene babagile ukundyesa. Linga une nalondigwaga isuti, abene babagile ukuula iyene. Abene babagile ukubuka palikimo nukunyulila une iligali, ukuti ndumbilile Inongwainunu. Abene babagile ukubomba kalikosa mu njila yila. O Tata, londesya imyoyo gyabo ulubunju ulu, napela bomba, kangi bitikisyaga abene balondesya ugwene pankyeni pa Ugwe. Une ngamanya, une ngusubila ukuti aligwesa gwa bene alimo mu Basaligwa. Kangi mbika une mula, nine, gwe Ntwa. Kangi linga yilipo inongwa mwa une ukuti une ndisakuyako kula, gwe Ntwa, Ugwe itolo setulaga ikyene kwa une, une ngutendekesyaga ikyene lululu ulu. Une ngulonda ukuya gwabwanaloliloli, gwe Ntwa, ukuti pa ulubunju lula patisakuyangapo ulutamio pa kisoko. Une ngulonda ukubuka mulisiku lila. Kangi une ngamanya akabalilo kako ikyo kikuyaga, ukwene kubagiile ukuya itolo umwisyugu. Polelo, ndula une ukumanya, batula abandu aba ukumanya.

160 Kangi akabalilo kako uswe tukuketa indumbula syitu sitikupasya! O, uswe tukwiyela Indumi inunu ukupilikisya pa wailesi, pamo ukubuka ku kipanga. Uswe tukupalisya Indumi inunu. Uswe tutikupasya ukuyoba isya Yeso pabuyobumo. Loli, gwe Ntwa, ngimba ubutulwanongwa bo busito fiyo kwa uswe, kangi ubwene bukutwala amasosi ku maso gitu, ukwilumbusya nukukuta kangi nukwima ukulwana nu bwene, filifyosa, ifyamwiko ifi fikubombigwa nkaya? Gwe Ntwa, mwitikisya u Gwandumi gwa Kyala akete ikyo pa uswe, kangi nukutusimba uswe. Tupaga ikylene, gwe Ntwa.

161 Pope mulamula isaga, Ntwa Yeso, lilino nukutendekesya indumbula syitu, nukutupa uswe ifimanyilo Fyako ifyabwanaloli ukuti Ugwe uli pakati pitu, ukuti uswe tubagile ukumanya ukuti uswe tukwambilila—ukwambilila ikimanyilo ikyabumalikisyo ikya ngulilo iyi.

162 Kangi uswe tukuketa ubusiwana, akabalilo kako unnyambala ikwitugasya nkisu nukuya na bana bapapigwe na bakasi ba nnyambala abangi, kangi—kangi utulinandwana utunini n'dukindi, kangi abamia bikukagigwa ukufuma ku sukulu ikyinja kilikyosa kangi abatubwa bikuya ba yuba, kangi lukayapo uluyindiko mma, kangi mumo fikuti abakikulu bikwigoga ni mbosya, bene, mukwisila mu kukwesa kangi—kangi ukunwa, kangi televizioni ni fyosa filafila ifi fikubwapula aminogono ga bana. O Ntwa, ngimba iki kikwimaga kabalilo katali bulebule? Kangi Ugwe, gwe Kyala Mwikemo!

163 O Tata, une—une ngwipilika mbuhesya fiyo umwisyugu ukuti ikindukimo kikufimbilisigwa ukubombigwa nakalinganakalinga, gwe Ntwa. Une ngamanya isyakuti njobe, loli une ngusuma, Ntwa, ukuti Ugwe kubikaga mu ndumbula syitu isyakuti tubombege. Tupaga ifindu ifi, Ntwa. Uswe tukusuma ifyene mu Ngamu ya Yeso. Ameni.

164 Isala yili kifuki. Umundu aligwesa ugwamahala uyu ali nako ukwinogona, amenye ukuti ikindukimo kitendekisye ukuboneka. Akayapo na yumoywene umundu mu nyumba iyi, uyu ali na minogono amatalusye, loli mwene yuyo amenye ukuti ikisu iki kikabagila ukwiyimika mbuyililo ubu.

Uswe tukabagila ukwiyimika, binitu. Kikayapo ikindu kimokyene, ukuya ntimi gwinu kangi nkundwe gwinu, kikayapo ikindu kimokyene kuko une mbagiile ukubalongolela umwe ulubunju ulu loli ku kwa Yeso Kristi kwene. Kikayapo ikindu iki une nkimenye. Inogona itolo ifya findu ifi fisololigwe ukuti fikwisa bo Ukunyakiligwa kukiisa, kilikyosa iki une nkimenyemo kibombigwe kifwanikisigwe.

165 Ugwe kuyoba, “Ngimba bule ikipake kya kinyamana?” Ikyo kikwisaga mu Mpyuto. Ikipanga kisakuyaga kibukile akabalilo kala. Patisakulondigwaga ukupaka aba, aba bo bakindile, muketile. Ukupaka kukubombigwa akabalilo aka

lilino. Ukupaka ko ukubonesya panja, ikimanyilo. Bopelaga kwa Kyala, bopelaga ku Mwene nakalinganakalinga!

¹⁶⁶ Une nguswiga ulubunju ulu, akabalilo kako uswe tukuguulila apa itolo ku miniti yimo. Kangi une ngwipilika ukuti umwe mukwipilika. Une—une mbagile ukupima ubwipilike bwinu, aligwesa gwa umwe mukugela ukwinogona, “O Kyala, londesya une mosa!” Iyo yo njila une ngwipilikila, nine. Une nsyagenie ukuti Indumi isi bo iyi, mwinangu, yikaga nganigwe nkati mbandu mma. Ugwe kubakemela abene kangi ugwe kukind-...ugwe—ugwe kubapela itolo abene ukuya pasi. Umunduyumo ikufimbilisigwa ukubomba ikyo. Une angali nikyelile linga lumo aalimundu yumo uyungi. Loli amanjele gangwilile une ukubomba ikyene, linga une ngufimbilisigwa ukuya nkikulu gwakukukuta. Linga une yone...Davidi aayobile, “Une kinunupo njege nkeka-gwapakifigo ku Nyumba ya Kyala, ukukinda ukwitugasya mfiHEMA ifya butulwanongwa.” Uko ko kutalusya. Kilikyosa iki Kyala ikulonda ugwe ukuti ubombe, bomba ikyene. Komma ukuya gwasoni. Linga kilipo pala . . .

¹⁶⁷ Kangi, kumbukilaga, une mmenye ikyo kindu kikulumba. Kuyoba, “Nkundwe Branham, ugwe kuyoba kuti imyoyo mihano na mitatu gyene igi gyaapokigwe?”

¹⁶⁸ Une ngamanya gilinga igi gisakupokigwaga, une ngabagila ukubabula umwe. Loli une nguyoba ikundu kimokyene: abene bisakuyaga banandi fiyo, mu lisiku bo ili. Inogona itolo, mu lisiku lila kuko Umwene aaliko, balinga aba baapokigwe. Inogona isya lisiku lya Noa, kangi ilisiku lya Loti—Loti, na bosa abene, Umwene alinkuti, “Momumo ukwene kwisakuyilaga pa kwisa kwa Mwanundumiana gwa mundu, kabuno, ikipata kyo kifinye, kangi injila yo nsekele.” Ugwe uketile, ugwe kwingilaga pa gwimwene, nu Mwene, kangi ifyo fyo fyosa popapo. Muketile? “Kangi loli bisakuyangapo banandi aba bisakuyagaga iyene.” Balinga aba bikwitika ubo bo Bwanalolit bwa Nongwainunu? Yeso Kristi aayobile momumo, “Banandi aba bisakuyangapo aba bikuyagaga iyene.” Banandi fiyo itolo. Uyege yumo mwa banandi bala. Une mmenye ikyo kukafu, ikyene kisito. Kangi ikyene kisito pa une ikuyoba ikyene, ngwipilika ulugano lwa bundu kwa umwe, loli ulugano lwa Kyala lukumfimbilisya une ukubabula umwe.

¹⁶⁹ Lilino, u Mbepo Mwikemo yulayula uyu abombaga imbombo mmasiku ga Abraham, abombaga imbombo mmasiku ga Kristi, aafingile ukuya apa ukubomba ikindu kilakila. Umwene ali apa. Lilino, linga une mbabulile umwe u Bwanaloli, Kyala ikufimbilisigwa ku Bwanaloli bula.

¹⁷⁰ Linga une ndikwima ni lisyu lyangu, une ngaya nnyambala gwa lisyu lyangu. Linga ugwe utikwima ni lisyu lyako, ugwe ukaya nnyambala gwa lisyu lyako. Lilino, une mbagiile ukufinga

ulufingo kwa ugwe pa kindukimo kangi une mbagile ukutoligwa ukubomba ikyene, loli—loli une ngwisaga ukukubula ugwe. Linga une ndiningongole kwa ugwe pa kindukimo, kangi nukwibwalala ukufuma kwa ugwe, une n'dinsyobi. Linga une nisile ukukubula ugwe, “Une ndiningongole kwa ugwe, loli une ngabagila ukukupu ugwe, loli ngugelaga ubununu bwangu bosa ukuti ngele,” polelo ugwe kunhobokelaga kangi nukundula une. Muketile?

¹⁷¹ Twesa tuliningongole na Kyala pa kindukimo. Uswe tukopile ku Mwene imiyoyo gwitu. Unko tuyege babwanalolindumbula ukufwana na iki. Sookaga panja nukuti. . . Komma ukuyoba, “Ena, lilino keta, une—une n’di gwa Presibeteri. Une n’di gwa Methodisti. Une n’di gwa Pentekosti. Une n’di gwa Kipanga kya Kyala. Une n’di gwa Nazarene. Une n’di gwa Pilgrim Holiness.” Komma ukwinogona ikyo! Bisakuyako maelifu maelifu ba abo mu gehena. Ugwe uyege Nkristi, mwa Kristi.

¹⁷² Balinga bikuyobaga, “Nkundwe Branham, ngumbukilaga une ndwiputo lilino, une ngulonda ukufyuka”? Kyala akusaye ugwe.

¹⁷³ Gwe Ntwa, Ugwe kuketa amaboko gabo. Isala yili apa, u Mbepo Mwikemo unkulumba abatamisye mu nyumba iyi ulubunju ulu. Une ngwipilika u Kuyapo Kwako. Une ngusyagania ukuti Ugwe uli apa ukuyindika i Lisyu Lyako, “Une ne Ntwa mbyele, kangi Une ngwisakonelalaga amisi pamusi na pakilo, kisita iki yumo abagile ukunnyaka ikyene ukufuma ku kiboko Kyangu.” Ugwe utumile panja i Lisyu Lyako ukubomba imbombo yimo, kangi Ilyene—Ilyene likubombaga ikyo, gwe Ntwa. Iisimbo likuyoba ukuti Ugwe gwe yulayula mmayolo, umwisyugu, kangi nabwila.

¹⁷⁴ Abene balinkutoligwa ukwitika, abandu bala mmasiku Gako balinkutoligwa ukwitika ukuti Mbepo Mwikemo aali mwa Ugwe. Kangi Ugwe gwalipelile Gwimwene (ukuya Nnyambala) Kyala, yuyu, Ugwe gwaali mpapigwa-mwa-mfunde Mwanundumiana gwa Kyala uyu aalisiile pa kisu kya pasi ukututabula uswe ukufuma ku butulwanongwa bwitu. Kangi panongwa yakuti abene balimbwene u Mbepo gwa Kyala, abene baagelile ukukipela ikyene ukuya kikindane. Kangi Ugwe gwaababilile abene, gwe Ntwa, “Ngaya Yone uyu ikubomba imbombo isi, yo Tata Gwangu uyu ikwitugasya mwa Une. Umwene yo ikubombo imbombo. Linga une munkoliile Abraham ukuya ‘tata’ gwinu. Abraha aaketile ilisiku Lyangu.” Naloliloli, umwene aaketile, akakbalilo kako umwene alimile kifuki nu Mwene, alimbwene Umwene ikubomba imbombo sila ni kimanyilo. “Umwene aaketile ilisiku Lyangu kangi aasangalwike.” Alinkuti, “Umwe mukusoba, kisita kumanya i Lisimbo kangi na Maka ga Kyala, mumo u Kyala aabagile ukugwa unsyungulu pa mfunde, nukutwala panja u

Mwanundumiana (ukwisila mu kupapa kwa mfunde) kangi ukwitugasya Mwene mbwisule bwa Maka Gake, mu Nnyambala yumoywene yula.”

¹⁷⁵ Kangi mumo Umwene aabagile ukwegga i Lilopa lilalila ukufuma ku Mbili ugu Umwene apele ukuya Kyabupi, kangi ukukemesya abandu aba Umwene abagile ukwitugasyamo mmyabo, ukukindilila imbombo Yake kubumalikisyo bwa kupyutigwa! O Kyala, basumumusyaga abandu ukuketa ikyo. Tupaga ikylene. Pokaga aligwesa uyu afyusisye ikiboko kyake. Kemesyaga indumbula syabo. Gwe Ntwa, amaboko gangu gali mmwanya. Ngemesyaga une, O Ntwa. Iyi yo nyumba ya kutendekesya. Ubu bo buyo kuko uswe tukufimbilisigwa ukusukigwa. Mwitikisya u Mbepo Mwikemo atusuke uswe ulubunju ulu, kangi atukemesye uswe ukufuma ku bubole.

¹⁷⁶ Uswe tukusuma, gwe Ntwa, ukuti patisakuyangapo nu mundu nayumo asookilepo apa loli bene babo bisakwisusigwaga nu Mbepo Gwako. Lumo patisakuyapo ni kyakwipilika na kimokyene umma ukufuma panja akabalilo kako ikylene kikuboneka. Loli, gwe Ntwa, buka mula nkati, kwabila panja ikipapa kangi tubonesya uswe iki uswe tuli, gwe Ntwa. Tupaga ikylene. Kangi polelo twisusyaga uswe nu Mbepo Gwako, ni ndumbula iyi yabwanaloli kangi mbelelesye. Kangi mkabalilo aka akandamio ni ngelo, Ugwe kuyaga nnyafupo kangi ngwantengopu kwa uswe akabalilo kako uswe tukukindilala pa njila, tukugulila ilisiku lila. Akabalilo kako amasosi gikusuluka pasi pa masaya gitu, panongwa ya butulwanongwa bwa kaya, u Mbepo Mwikemo ali keta pasi nukuyoba, “Alipo yumoywene uyu Une mbagile ukunsimba, umwene yo Gwangu, umwene yo Gwangu.” Tupaga ikylene, gwe Ntwa. Tukusuma ukuti ikylene kyagigwe mwa uswe umwisyugu. Uswe tukusuma ikylene mu Ngamu ya Yeso. Amen.

Linga ngwisa kukisoko pa bumalikisyo bwa lisiku,

Kangi imbepo syabumalikisyo isyabusulumanie siputile;

Isakuyapo Umunduyumo ikugulila uyu isakunnangisyaga une injila,

Une ndisakulobokaga u Yorodani nimwene.

Une ndisakulobokaga u Yorodani nimwene,

Yesu aafwile ukutabula imbibi syangu syosa;

Bo nguketa une ingisi, Umwene isakungulilaga une,

Une ndisakulobokaga u Yorodani nimwene.

¹⁷⁷ Une ngulonda ukummanya Umwene lilino. Ega ikiboko kyangu, gwe Ntwa mpala, ndongolela nkyeni, unko nime une. Unko une niime apa, gwe Ntwa, ukulwana na kilikyosa iki kikukoleligwa ukuya kisobi, kilikyosa iki kikuboneka ukuya

kisobi. Une ndikupasya uku aligwesa ikuyoba fiki, uno une niime, gwe Ntwa. Akabalilo kako une mbombile fyosa ifi une mbagile ukubomba, ndula une ukwima. Ega ikiboko kyangu kangi ngwaba une ukukilania ikyene, gwe Ntwa. Bomba ikindukimo, unko une niime. Akabalilo kako ifindu fila fikwisa, kangi ubukabi bwa kisu iki kangi nu bufyuke bwake bosa kangi ulwimiko lwake; goga amaso gangu ku kyene, unko une ngete mwene yu Mwene Uyu alimfwilile une. Linga ikyene kikwegela ukuti ndage umwinangu aligwesa uyu une ndinagwe, linga ikyene kikwegela ukuti ndage kilikyosa iki une ndinakyo; ikyo kitikusanusya ni kindu na kimokyene, une ngwiyipa fyosa itolo pa kigemo. Ikyo kyo ikyo, unko une niime gwabwanaloli. Kangi ilisiku limo akabalilo kako umuyi gukupululuka ukufuma ku kisyo kyangu, kangi une mmenye ukuti indumbula yangu yikindile kangi amasiku gangu gamalike, kangi akabalilo kangu kafwene kangi ilikadi lisosigwepo pa kitala, une ndikulonda ukuloboka Yorodani nimwene. Umwene isakuyaga pala. Ena. Akabalilo kako ingisi une nguketa, Umwene isakungulilaga une, une ndisakulobokokaga Yorodani pa nimwene. Linga une ngumwimilila Umwene lilino, Umwene isakunyimilaga une akabalilo kala. Une nguyaga nu bumi ku Mwene Yuyo alimfwilile une, bwisakuyaga buhofu bulebule akabalilo kala ubumi bwangu. Iyo yo njila une ngulonda ukwimila.

178 Une ngusakikisya balipo abandu ababine apa. Ngimba umwene ayabanisenie amakadi gamo? Une nibibwe. Ngimba abene bayabanisye amakadi? Ngimba amakadi galigosa gayabanisigwe? Alipo yumo uyu ali nayo amakadi? Umma.

179 Une ngugulila itolo u Mbepo Mwikemo. Linga umwe itolo mukwitikaga pene, itolo yaga nu luwitiko, komma ukwilamwa. Linga Kyala ikusetulaga kwa une indamio syako. . . Kilikyosa iki ikyene kili, une ngamanya; linga ugwe kufyusya ikiboko kyako, ugwe ukampanya une kangi une ngakumanya ugwe. Polelo linga Kyala ikusetulaga apa, ngimba ugwe kwitikaga ikyene yo Gwandumi yulayula uyu aatwele Indumi bo ukubongotola kukanda itolo kunyuma kula, ikyene kikuyaga u Gwandumi yulayula uyu alinkutwala ikyene lilino lululu bo ukubongotoka ukungi. Ngimba ugwe ubagile ukwitika ikyo? Linga ugwe ubagile, fyusya ikiboko kyako. Filikanunu. Filikanunu, u Ntwa alipaga ikyene.

180 Umwene itugesye kifuki na une. Alipo uyungi yumoywene itugesye kifuki na une, yo Nka. Snyder, pamo u Nka. Murphy uyu apa, uyu ingamu yake yo ani, itugesye papapa apa. Une mbamenye abene.

181 Une ngamanya unnyambala uyu, umwene nhesya kwa une. Loli Kyala ammenye umwene. Linga Kyala ikusetulaga ikyene lilino, balinga ba umwe mumenye ukuti ikyene kikaya. . .

¹⁸² Komma ukuketa kwa une. Ikyangu, une ne gwantwaya gwa ku Kentucky, mumo ikyo kiyiliile. Une—une ngaya nubumanyili bwakufwana nukufwana mma, kifuki, uku—uku toligwa nukusimba ingamu yangu yene. Loli kilipo ikindu kimokyene iki une mmenye naloli, une nummenye Umwene. Kangi ikyo, kyo—kyo kyosa iki une ngapasya ukumanya. Lilino, komma—komma ukubika indumbula pa galamala gwangu ukuti ikuti fiki.

¹⁸³ Kangi umwe mubagile ukwinogona ukuti ubulumbilili bwangu ulubunju ulu bwaali bosa ukusokapo pa kugoloka kangi na filifyosa, ugwe golosyaga ubwene ni li Bangeli akabalilo kamo kangi keta linga ugwe utikuya palapala pakatikati pa iki kukilondesya. Keta linga ikyakwenesya kyako kikaya nkati akabalilo kako ugwe—akabalilo kako ugwe kukibika ikylene nkati mula. Komma ukukigolosya ikylene na minogono gako, loli gololaga ikylene na iki Umwene aayobile. “Ikipata kyo kifinyr, injila yo nsekele, kangi banandi bikuyangapo aba bisakuyayaga iyene; nongwa yakuti injila yo mbapate iyi yikulongolela ku bonangiko, kangi ikipata kyo kinywamu, kangi bingi bisakwingilaga mulamula,” maelifu-elifu ukukwandisania na maelifu-elifu bisakwingilaga mula. Yumo ukufuma mwa elifu-elifu yo lumo isakuyaga mu njila iyi ikylene kikwisa. Mwaketa lelo umwe. Ikyo kyo iki Umwene aayobile. Lilino, Umwene akaapelemo siku imbalilo yila, loli Umwene aayobile, “Mumo kwayiliile mmasiku ga Noa, imyoyo mihano na mitata. Mumo ukwene kwayiliile mmasiku ga Sodomu, batatu.” Ukufuma ki kindu kyosa, batatu bapokigwe, ukwisila mmoto. Mo mumo ukwene kwisakuyiilaga!

¹⁸⁴ Lilino, linga aligwesa nnyakyala naloliloli, une ngulonda ugwe ukunketa unnyambala itugesye apa, umwene ikungetesya une itolo ukumilisia mumo umwene abagiile. Afyusisye ikiboko kyake, Une ngammanya umwene; ngambonamo siku umwene, kangi une ngamanya nakimo ikya umwene. Umwene itugesye itolo pala ikungeta une. Loli, keta, umwene ikupela ulukolelano, umwene ikwiputa. Lilino, uko ko kotalusya. Lilino, linga Untwa isakumbulaga une. . . Unnyambala yula itugesye kubutali fiyo na une, kangi ulu lo lukomano lwitu lwakwanda, kangi pala umwene itugesye pala. Linga Untwa isakusetulaga kwa une iki umwene aali—iki umwene ali. . . Une—une ngabagile ukumbumbulusya umwene. Une ndikubomba, une ngabagila ukubomba ikyo, nongwa yakuti Kyala abombile nganila ikyo. Loli ikylene kukongelelaga ngapo ulwitiko lwinu. Aligwesa ikuketa lilino, Umwene ali papapa apa, itolo u Mbepo yulayula. Kangi kumbukilaga, Yeso afindile ulufingo iki, bo ubumalikisyo bwa kabalilo bukafika. Ikyene bwila kyo kili kimanyilo kyabumalikisyo.

¹⁸⁵ Ilisiku limo, Leo na une twalitugesye pa lukindi, kangi twe bamo ba uswe tukuyoba. Kangi une ndinkumilisia

ukwipilika ukuti kulipo ukwisanusya kukwisa, ukwisanusya kukwisa. Akabalilo kako uswe tuyobege isya ukwene, ikyene kitikuyaga ukusanusya mbutumigwe bwangu mma, panongwa yakuti ikyene kitikubombigwaga kangu mma, loli ikyene kikuyaga kusanusya mwa une. Une bwila yone nkololofu kangu itolo ngwitikisya abandu bandongosyege une kangu bandiimege une, kangu ukutuma injila *kuno* kangu injila *iyu*. Linga une naabombile ikindukimo iki Untwa aalimbulile une ukubomba iyolo fiyo, une angali ngaya mu ndamio iyi une ndimo umwisyugu. Une ngusooka panja undungu ugu gukwisa ukwakuya pa nimwene na Kyala. Ena, nkulumba. Une—une ngufimbilisigwa ukupilika ukufuma ku Mwanya. Une ndikulonda ukuya nkololofu, une ngulonda ukwima pa bwipilikisyo bwangu nimwene.

¹⁸⁶ Unnyambala yula, Ikyene kukumilisya ukugomokela kulakula ku mwene, umwene itugesye kulakula ku nyuma, panongwa yakuti unnyambala yula ikwitika, umwene yo naloliloli ikwitika. Une nguketesya ikilundilo kulikosa, kangu Ikyene kikugwila palapala ukugolosya ukugomokela ku nnyambala yula. Umwene ali nako ukulondesya, umwene alinunsigo, loli umwene alinunsigo ku munduyumo uyungi. Uko ko kutalusya. Ugwe kummwiputila umunduyumo uyungi. Ugwe uli nagwe umunduyumo uyungi pa ndumbula yako. Uko ko kutalusya, buli mukaamomumo? Umwene yo mwinako. Linga une ngukubulaga ugwe iki kitamisye nu mwinako, ngimba ugwe kunyitikaga une ukuya ntumwa gwa Kyala? Umwene yo kinwelwa. Uko ko kutalusya. Linga ikyo kyo kitalusye, fyusya ikiboko kyako.

¹⁸⁷ Ngimba ugwe kwitika? Umunduyumo ukukilania apa afyusisye ikiboko kyabo, unkikulu kunyuma muno, umunduyumo. Ena. Ena. Ugwe ukampanya une? Une ndinhesya kwa umwe mwesa? Une ngakumanya ugwe, loli Kyala akumenye ugwe. Ngimba kwitika ikyo? Linga Kyala isakusetulaga kwa une iki kili pa ndumbula yako, ngimba ugwe kunyitikaga une ukuta ntumigwa gwa Kyala? Nkikulu nnini, iki kutamigwa nakyo yo mwana kunyuma kula. Uko ko kutalusya. Kangu u mwana yula ali filonda fya eczema ku kisyo kyake. U dokotala atoligwe ukubombapo nakimo ukufwana ni kyene. Ugwe ulu nhesya kuno, ugwe nu nganigwa gwako mwitugesya apo. Ugwe kwitika Kyala abagiile ukumbula une ukuti ugwe gwe ywani pamo kuko ugwe kufumila? Ugwe kwitika ikyene? Ngimba ubagile ukwitikisya ubupole bwa mwana linga ugwe ubagile? [Unkikulu ikuyoba, “Ena.”—Nsimbi.] Umma ndaga, ugwe ubagile ukugomokela ku Somerset, Kentucky, kuko ugwe kufumila. Kangu itika ukuti umwene ikuyaga kanunu, ifilonda fya eczema fikundekaga u mwana linga ugwe kwitika ikyene.

¹⁸⁸ Akabalilo kako une njobile ilisya lila, umunduyumo imile kunyuma kula nnyumba iyi, ikufuma ku Somerset, Kentucky,

ikwiputa, ni mbungo ya ndumbula. Ugwe kwitika ukuti Kyala ukibapelaga umwe ukuya kanunu? Linga ugwe kwitika ikyene ni ndumbula yako yosa, kangu kwitika ukuti Kyala ikubumbulusyaga kangu nu kupolesya.

¹⁸⁹ Apa, apa alipo, une ngusubila ukuti ikiboko kya munduyumo kyaafyukile ukubukila kulakula apa, palapala ukubukila, u nkikulu. Ena, une nkibwene ikiboko kyako. Ngimba une ndi nhesya kwa ugwe, nkikulu? Une ngakumanya ugwe. Uswe tukaganamo siku. Ngimba ugwe kwitika une ukuya ntumigwa gwa Kyala? [Unkikulu ikuyoba, “Ena.”—Nsimbi.] Kwitika ugwe? Ugwe uli nu nsigo pa ndumbula yako, pamo ikindukimo. Ugwe kwitika linga Kyala ikusetulaga kwa une, ugwe kwitika ukuti Ikyene yo Mbepo yulayula uyu aali mwa Kristi? Undumego itugesye apa, umwene ikwitika ikindu kimokyene kilakila, yope? Ngimba ugwe ubagile ukwitika ikindu kilakila? Ikyene kyo ukufwana nu ndindwana unnini ugwinu itugesye kifuki na umwe apo. Uko ko kutalusya, umwene ali na kansa. Loli ngimba umwe mukwitika ukuti Kyala ikumpolesyaga umwene? Linga ugwe kwitika, fyusya ikiboko kyako. Umma ndaga, bika amaboko ginu pa mwanike.

¹⁹⁰ Gwe Ntwa Yeso, mu Kuyapo kwa Mbepo Gwako, une ngukemela umohesi uyu ikungoga u mwanike. Une ngubikapo, nu lwitiko, i Lilopa Iya Yeso Kristi pakati pa ngogi yula nu mwanike. Aliyaga mumi umwene. Amen.

¹⁹¹ Yaga nu lwitiko mwa Kyala. Komma ukwilamwa. “Linga ugwe ubagile ukwitika, fyosa ifindu fibagile.” Linga ugwe ubagile ukwitika, ifindu fyosa fibagile. Nubutalusyi.

¹⁹² Umunduyumo uyungi kunyuma nkati mula afyusyisye ikiboko kyabo, kubuyo bumo, ugwe, nkikulu uko ku bumalikisyo. Ugwe kunyitika une ukuya ntumigwa gwa Kyala? Une ngakumanya ugwe, ugwe ukammanya unne. Ugwe kwitika ukuti Kyala abagile ukusetula kwa une iki kikutamisye ugwe? Ngimba ugwe ubagile ukummwitikisya Yeso ukuya Mbumbulusyi gwako pamo Mpi, kilikyosa ikyene kili—kilikyosa ikyene kili . . . ? Ugwe kwitika ikyene lilino? Umma ndaga, polelo ukulakatika kwa ndepa kuno ugwe gwali nako, ukwene ko kwene ugwe gwali nako. Linga ikyo kyo kutalusya, imilila pa malundi gako, linga ikyo kyo kutalusya, itolo ukuti abandu babagile ukuketa ukuti ikyene bo bwanaloli. Umma ndaga, ukwene kukukulekaga ugwe lilino. Ugwe bukaga ku kaya nukuya kanunu. Kyala akusaye.

Ugwe kufuma ku Kentucky, nugwe. A-ha, uko ko kutalusya.

¹⁹³ Unkikulu uyu itugesye kifuki na ugwe afumile ku Kentucky, yope. Umwene yoyuyo, yope. Une ngakumanya ugwe, momumo bule? Loli une mbagile ukukubula ugwe ugwe ulinakyo ikindukimo kikutamisye ugwe. Linga une mbagile ukukubula ugwe fiki kikutamisye ugwe, ngimba ugwe kummwitikaga Kristi

ukuya Mbumbulusyi gwako? Ikyene kili mu nsana gwako. Linga uko ko kutalusya, fyusya ikiboko kyako, mmwanya fiyo ukuti abandu babagile ukuketa. Umma ndaga, bukaga kukaya lilino, ikyene kikukulekaga ugwe. Ulwitiko lwako lukukupela ugwe ukuya kanunu.

Une ngusasasania umwe ukwitika. Une ngusasania ulwitiko lwinu ukwitika.

¹⁹⁴ Apa itugesye unkikulu apa, akolelile ikitambala kyake ku kisyo kyake. Une ngakumanya ugwe. Kyala akumenye ugwe. Ugwe ufumile ku Joliet, Illinois, kangi ugwe uli ni lyulu lya kansa. Uko ko katikati kutalusya. Ugwe ubagile ukuswiga... (Ena, uyo yo—uyo yo nkikulu uyu Rosella atwele. Uko ko kutalusya. Gulila, umwene ambulile une isya ikyo, loli umwene akamenyemo siku ukuti une ngalimmenyemo siku unkikulu uyu. Uko ko kutalusya. Kibonike itolo ukuti ulwitiko lwa nkikulu lunywamu fiyo.) Une ngukubulaga ugwe ikindu kimokyene ugwe—ugwe umenye ukuti une ngamanya. Ugwe kwiputula umwanike uyu itugesys apa pa bumalikisyo bwa kikota, uyu yo mbine. Uyo yo mwanako. Uko ko kutalusya. Ameni. Ugwe umenye ukuti une ngakimenye ikyo.

¹⁹⁵ Ikyene kili pala, Ikyene yo Mbepo Mwikemo! Ngimba umwe mukwitika Ikyene? Ngimba umwe mukwitikisya Ikyene? Polelo linga ikyo ko kutalusya, iki une njobile ukufwana na “ikipata kyo kifinye, kangi injila yo nsekele” kyo kitalusye. Yeso Kristi, Mwanundumiana gwa Kyala, ali papapa apa lilino. U Mbepo gwa Kyala gwabumi ali papapa apa. Ngima umwe mukwitika Ikyene? Polelo, ukubitikisya umwe ukumanya ukuti une ngaya nayumo mma ukubumbulusya, une ngaya mbumbulusyi mma, loli u Mbepo gwa Kyala aasalile itolo une ukwibonesya Mwene. Une ngaya nako nukumanyila nakumo. Une ngayanako nukumanya aka kalikosa. Loli ikyene yo Mbepo Gwake uyu ikubomba iki, umwe muketile, kangi Umwene ikulonda umwe ukumanya ukuti une mbabulile umwe u Bwanaloli.

¹⁹⁶ Ubu bo Bwanaloli, ukuti Yeso Kristi ikubapela mwesa ba umwe ukuya kanunu lululu ulu linga umwe mukwitika ikyo. Lilino itolo mumo...Linga Ikyene kyabombil'imbombo mu Kingston, ifi ababatumigwa, pamo kali yo ani kunyuma kula, aketile Ikyene kikubomb'imbombo mu Kingston, maelifu ukuya babumbulusigwe, fiki Ikyene kitikubombag'imbombo mwa America uyu kuko uswe tulinakyo mumo kuyilile lilino? Ngimba fiki uswe tukabagila ukwitika ikyene? Panongwa yakuti uswe tukabagila ukukilania ubusanusyo pankyeni. Ngimba umwe mukwitika ikyene? Fyusya amaboko ginu.

¹⁹⁷ Lilino, amaboko galagala gala, bika pa munduyumo kifuki na ugwe, unko une nummwiputile umwene ukufuma papapa apa, kangi komma ukuya nu kwilamwa kangi mma mu ndumbula yako, iki kikumalaga ikyene.

¹⁹⁸ O, mwe, Nkundwe Neville! Mumo une nanyonywelaga, mumo une niputiile, mumo une . . . Umwe mubagile ukwinogona ukuti une nsyutil'untu; une ngasyutuntu'mma. Une mmenye palapala papo une ndipo. Linga une itolo mbagile ukutwala akandu akanini aka ukwisa kwa umwe! Ngimba umwe mukusyagania ukuti Yeso Kristi, u Mwanundumiana gwa Kyala, apa nkati mbandu ulubunju ulu, lululu lilino, alipo lululu ulu, ikwibonesya Mwene?

Ena, umwe mukuyoba, "Nkundwe Branham, *ugwe* uyobile ikyo."

¹⁹⁹ Ngimba une njobile bulebule ikylene? Une ngakumanya ugwe. Alipo unkikulu uyungi ali na TB. Ugwe ubumbulisigwe, kalumbu. Akusaye ugwe. Une ngusuma ubuhokelo, ugwe gwiputilaga unkikulu gwa TB, panongwa yakuti umwene ali nkikulu gwa nywili-mbuha. Ena. Umma ndaga, itikaga ikylene. Umma ndaga. Umwene ali apa. Ikyene ko Kuyapo Kwake.

²⁰⁰ Lilino, apa fyo iki Umwene aayobile, "Ifika ifi fisakubakongaga abene aba bikwitika. Linga bikwala amaboko gabo pa babine, abene bisakubumbulukaga." Ngimba Umwene ikusyobaga bulebule? Muketile, ikylene kikaya kwa Umwene mma, ikylene kikiya pa une mma, lilino ikylene kili pa ugwe. Lilino ugwe itika.

²⁰¹ Une nguketa ku kunkikulu innini itugesye kunyuma kula itolo lilino, umwene ali nu lwitiko lwingi. Umwene nu ndume bisile itolo nubupya kwa Ntwa. Umwene itugesye mulamula mu lukomano, ali nu kutuyuka kuko abadokotala babukaga ukupanja pa mwene itolo pabutasi, kangi u mwana gwake ali kifuki ukupapigwa. Kangi u dokotala ayaga pakumpanja ukufuma apo, loli umwana apapigwe kangi abene bakabagila ukuyaga indepa ya hernia kangi'mma. Iyene yosa yibukile. Muketile? Fiki? Umwene itolo itugesye bo . . . Umwene akisapo kuno ku kigemo bo ulu. Umwene itolo itugesye ku nyuma kula kangi nukwitika ikylene. Ngimba uko kutalusya, Nka. Green, une ngusubila iyene yo yiyo, kunyuma uko? Uko ko kutalusya. Keta ikiboko kyake? U dokotala akabagile nukupaga pa butuyuke, apene posa pakindile. Fiki? Umwene aalitike ikylene, ukusoka panja itolo nukuyoba, "Ikyene kyo kutalusya!"

²⁰² Lilino ugwe bomba kilakila, kangi ukukomeligwa pasi kosa uko ugwe uli nako kwisakifimbilisigwa ukusooka. Kyala, Ywani abagile—Ywani abagile ukutuma Ikindikimo mu mbili gwa mundu, ukubuka ku nsyuka gwa kuluma kwa njoka yila iyi yaali nkilundi kya nnyambala yula, ukunfulasya, ukuti yin'goge umwene, kangi kibagile ukukimika ikylene nukukigoga ikylene palapala pala, bo bunywamupo bulebule Umwene abagile ukugoga ububine mu mbili gwako. Panongwa yakuti, unnnyambala yula aali mbubabe kangi umwene afimbilisigwaga

ukubwaga ubutuli. Ugwe nugwe kufimbilisigwa, nugwe. Linga ugwe utikubwaga ubwene, ugwe kufwa.

²⁰³ Lilino umwe umilisyaga amaboko ginu yumo pa nnine. Komma ukwiyiputula gwimwene, ugwe gwiputilege u mundu uyu ali kifuki na ugwe. Uko ko kufwana-Kikiristi.

²⁰⁴ Manyilaga iki, manyilaga iki, ukuti, mumo ugwe kubombela ku bangi, ugwe kubomba kwa Kristi. Akabalilo kako ugwe uli nnunu ku munduyumo uyungi, ugwe kuya nnunu kwa Kristi. Linga ugwe utikummwega kanunu umunduyumo uyungi, ugwe utikummwegakanunu Kristi. O, mwe!

²⁰⁵ O, linga une nabagiile ukutwala iki ukuya kimalikano, linga une mbagile itolo ukupela abandu bakete ikyene, iki une nguketa kangi iki une ngwipilika, kangi iki une mmenye iki kikuboneka, muketile. Mumo Kristi ikugutula ukufuma pa Ndumi yila ulubunju ulu, ukwisa itolo pasi pa ndumbula sya bandu nukupela ikindukimo mula; komma ukuyanhobofu, kooma ukwipilika (ikyene kikwisa nakyo ikyene), loli ukupela ulwitiko ulusitakufwa mula ulu lutisa kuyoba, ukupa ifwasi ku ndugu.

²⁰⁶ Lilino, Umwene ikupilikaga ulwiputo lwangu, Umwene ikupilikaga ulwako. Umwe mwiputilanege yumo ku nnine lilino, akabalilo kako une ngubiputula mwesa ba umwe.

²⁰⁷ O Ntwa, akabalilo akakulumba akapalapala aka, uswe tukusyagania ukuti aka kisanusyaga ukukindana pakati pa bufwe nu bumi, ku bingi. Kangi une nguya nulutende mu Kuyapo Kyako, kabuno une mmenye, Ntwa Kyala, ukuti une ngufimbilisigwa ukwiputa ni ndumbula yangu yosa. Une ngusyagania ukuti palema nalinga kukabagila ukuyapo umundu umbine pakati pitu mu maminiti mahano agangi, ukuti aligwesa umundu apa ikusyaganiaga ukuti Ugwe uli apa. Apa abene bimile ulubunju ulu, gwe Ntwa. Bitikisya abandu bala bafyusye amaboko gabo babo bameenye ukuti une ngabamenye abene, kangi nakamo akakufwana na bene. Loli u Mbepo Gwako amenye abene. Ugwe umenye isyakusofu sya ndumbula syabo, ko kunywamuponki mumo Ugwe umanyiile ubukomeligwe bwabo pasi kangi ni ngubilwa syabo! Polelo, Ntwa, itikisya ukuti kuyege mwisyugu, itikisya ukuti ukwene kuyege itolo lilino ukuti u Mbepo Gwako ikupalamasyaga imibili gyabo imibine. Tupaga ikyene, Ntwa. Abene bikwupitula yumo ku nnine.

²⁰⁸ Kangi une ngwiputa, Gwempala Kyala, ukuti u Mbepo Mwikemo ikukipelaga ikyene kiyeye kya naloliloli ku bene, ukuti abene batisakwilamwamo kangi siku ikyene. Kangi bulipo ububine ubungi, Ntwa, ubu bo bunywamupo ukukinda ububine ubupalamsigwe, ubwene bo bubine bwamwambepo. Indumbula yiliyosa yiliyaga nyiguke.

²⁰⁹ Ntwa, kikuyaga bulebule ikyene ukuti Ugwe gwaalimile pala pa lubafu lwa Abraham, kangi gwabombile ikindu iki

kilakila, gwaalimbulile Sarah uyu ali “kumbenu” kwa Ugwe, i Lisimbo likuyoba, “nkihema umwene alinkuseka,” kangi Ugwe gwaalimbulile umwene. Kangi Abraham alinkusyagania ukuti yula ali yo Elohim, Kyala unkulumba. Mmaminiti manandi Ugwe ulinkuyonga ukusokapo pa maso gake.

²¹⁰ Kangi, Ntwa, akabalilo kako Yeso aalimile nukubomba ikindu kilakila, nukuyoba, “Umwe munkolile Abraham ukuya ‘tata,’ gwinu kangi loli umwe mukuyoba ukuti umwe mugamenye a Masimbo.” Alinkuti, “Umwe mukusoba naloliloli, kisita kumanya a Masimbo kangi na Maka ga Kyala.” Kangi abene balinkunkolela Umwene “Belezebabu.”

²¹¹ Loli Ugwe gwafingile ulufingo ukuti mmasiku agabumalikisyo ukuti Ugwe kwisa konenelaga u Mbepo Gwako kangi. Unsololi alinkuyoba, “Nkabalilo ka namayolo ukwene kwisakuyaga Bwelu.” Kangi uswe tufikile apa.

²¹² Akabalilo kako ikisu kyakisiwana iki kikubunguluka pasi pa butulwanongwa, mumo unnyambala uyu agalile ikupepeluka ukubuka kukaya nkilo, lululu ulu umwene ikutusuligwaga pakatikati, patisakuyako nu lufumbi lwa luteko lwa kisu, pakafu, ukusyala ukufuma ku kyene. Kangi uswe tukuketa akabalilo kakumalika.

²¹³ O Kyala, ega ukwilamwa kosa ukufuma kwa uswe. Twegaga uswe ukubuka mu kusyungutila kula lilino itolo. Isaga, Mbepo Mwikemo. Baalulaga a mapiko Gako amakulumba, fugatilaga akalundilo aka akanini akabandu lilino itolo, kangi itikisyaga gwiysisuyege Gwimwene mu ndumbula syabo, kangi bitikisyaga abene bamanyege Ugwe guli mu Kuyapo Ukwakyalala, ukuti ikyene yo Ugwe, “Une ne Ntwa Yuyo ikubumbulusya imbungo syosa.” Kangi u Kuyapo Kwako kuli bombaga ikindukimo ku ndumbula syabo iki kikubapelaga abene ukusokapo ukufuma apa, ulubunju ulu, ukwitika na kyosa iki kili mwa bene. Kangi umundu umbine kangi umonywa aligwesa ali bumbulusigwaga.

²¹⁴ Kabuno, ukuya gwabombo Gwako, une ngwima kangi nukukaga umohesi aligwesa, ukukaga ububine bulibosa, ukukaga Setano.

²¹⁵ Ugwe uponjologwe, kangi ugwe ukaya nakamo loli nsyobi. Kangi uswe tukukolela ikiboko kyako pa ugwe ulubunju ulu, mu Ngamu ya Yeso Kristi. Kangi ukuya ntumigwa Gwake, ukulumbilila i Lisyu Lyake kangi nukubabula abandu u Bwanaloli, ukuti ukuya ntalusyi nukugoloka ni Lisyu Iya Kyala, une ngukukaga ugwe, Setano, mu Ngamu ya Yeso Kristu. Sokapo ukufuma pa aligwesa gwa bandu aba aba bafumile kubutali na pabupipi, ukuti bapole. Ugwe sokapo pa kilundilo iki kangi ukufuma pa bandu aba. Une ngukufimbilisya ugwe ukwisila mwa Kyala gwabumi. Kangi i Libageli lyatile, “Ulwiputo ulwakubombabomba, ulwakumilisya ulwa mundu umwikemo lukuponjola fiyo.” Kangi abandu abikemo bingi

babikile amaboko gabo pa babine, ulubunju ulu. O, Setano, ugwe kulonda ukubega abene ukwinogona ukuti ikyene aali yo une, polelo ugwe kwegaga ulwimiko ukufuma ku bene. Loli ulwene lo lwitiko lwabo mwa Kyala, lope, abene bikwitika Kyala! Kangi ugwe kufimbilisigwa ukusama, panongwa ya lwitiko lwabo. Polelo egaga ubwendo bwako ukufuma apa, kangi bukaga mu ngisi panja kuko ugwe kokumyako. Une ngukukaga ugwe, mu Ngamu ya Yeso Kristi, nu bulagili bwa Libangeli Iya Kyala, nu kutumigwa kwangu nu Gwandumi. Lilino bukaga, mu Ngamu ya Yeso Kristi, kangi baliyaga abene babuke. Amen.

²¹⁶ Ngimba umwe mukwitika, indumbula syinu syosa, ukuti umwe mupolile? Fyusya ikibooko kyako, yoba, “Une lilino ngwitikisya Yeso Kristi ukuya Mbumbulusyi gwangu. Imisyungulu gyosa gisokilepo ukufuma kwa une. Une lilino ngwitikisya Umwene mu bwisule bwa maka Gake, mu busayigwa bwa Kuyapo Kwake. Une ngwitikisya Umwene.”

Ulwitiko lwangu lukuketa kwa Ugwe,
 Ugwe Kang’osi gwa Kalivari,
 Mpoki Gwakyala;
 Lilino mbilika une bo ngwiputa,
 Sosyamo syosya imbibi syangu,
 Pamo ukundeka une njongege
 Ukufuma kwa Ugwe ndubafu.

Lilino unko tufyusya ifiboko fyitu nubunoge bwanaloliloli kwa Mwene lilino.

Bo ngwenda nguto inditu iya bumi,
 Kangi ubusulumanie ukusyungutila une
 bukubaala,
 Yaga Ugwe Ndongolela gwangu (O Kyala!);
 Kagaga ingisi yiyege pamusi,
 Syulaga ubusulumanie, uboga,
 Pamo ukundeka une nsobege
 Ukufuma kwa Ugwe ndubafu.
 . . . ipyana ilikabi!



IKIPATA KYO KIFINYU KYA59-0301M
(Strait Is The Gate)

ULUBAMBIKO LWA KIPANGA

Ubulumbilili ubu butwaligwe nu Nkundwe William Marrion Branham, ubu pakwanda bwatwaligwe nki Ngereza pa Ndungu kulubunju, Mariki 1, 1959, ku Branham Tabernacle mu Jeffersonville, Indiana, U.S.A., bwegigwe pa busimbe bwa tepi ya magneto kangi busimbigwe kisitakutumula mu ki Ngereza. Ukusimba ukwa mu Kyangonde ubu bwasanusigwe nu kuyabanisigwa na ba Voice of God Recordings.

KYANGONDE

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org